

焦太史編輯國朝獻徵錄

焦太史編輯國朝獻徵錄卷之二十五目錄

吏部二

尚書

喬宇

楊旦

廖紀

羅欽順

汪鉉

熊浹

唐龍

周用

聞淵

李默

萬鏜

夏邦謨

歐陽必進

胡松

楊博

張瀚

嚴清

陳有年

陸光祖

仁和張蔚然

同校

吳興茅元儀

錢塘徐象標

刊行

目錄

焦太史編輯國朝獻徵錄卷之二十五

吏部二

尚書

光祿大夫柱國少保兼太子太保吏部尚書白

巖喬公宇行狀

陳璘

公諱宇字希大別號白巖姓喬氏世居太原之樂平
曾祖鑑主湯陰簿祖毅工部左侍郎父鳳兵部職方
司郎中俱贈光祿大夫柱國少保兼太子太保吏部
尚書曾祖妣李氏祖妣王氏妣路氏皆贈一品夫人
公少奇穎比成童日誦千餘言爲文浩瀚卽折衷理

道人多奇之時公從職方公宦京師少師連菴楊公
爲中書舍人學行道誼名天下職方公以公與兄先
祿公宗從焉一時四方之士從遊雲集公以奇才壯
志藻思沛然儕輩莫之與京十七歲以金吾衛籍中
成化庚子順天鄉試錄其文以式甲辰中進士通政
司觀政天下名士就交者甚衆相與講學之餘政事
之要無不考焉復倡爲詩賦一變時文之陋丙午授
禮部儀制司主事是歲東宮皇太子婚禮成及五王
冠禮畢俱荷白金文綺之賜明年會試天下士署提
調官綜理有法撤棘之日簾內什用之器類爲有司

所取公則悉還之民丁未太宜人路氏卒歸葬樂平
公杜門謝客讀禮之暇惟以讀書考究爲事自是所
養益深祖塋有松數百株皆職方公手自封植有蟲
食之殆盡公自爲文以祭遂止庚戌服闋縣令以金
爲贖公却之除吏部文選司主事公才名甚茂太宰
三原王公特有是選壬子署考功員外郎丁巳補文
選司郎中公日益策勵門無私謁清畏人知凡三與
考察惟公惟慎輿論稱允壬戌遷太常少卿八月有
事南郊公導駕齋壇孝廟奇公貌曰真太常也乙丑
孝廟賓天公以執事哀送梓宮於泰陵正德改元丙

寅武宗皇帝卽位告祭天下公分祭中鎮霍山黃河
西海媧皇商湯王陵及晉代藩諸王陵園事竣之日
咨諏民隱爲六事上之多見采納曰恤邊民厚邊軍
廣儲蓄省科派慎守令重祀典戊辰轉光祿卿專以
節浮費甦民因爲務數十年積弊渙然更新一歲陞
戶部右侍郎庚子遷左侍郎邊餉供億不乏積弊革
除無遺春至六月不雨漕河涸公奉命禱祭海嶽精
誠所格駐節雨澤隨之祭竣遂霖雨四沛無不霑足
時宦官瑾用事大肆饕虐公卿多被通關公恬然自
守後瑾敗公獨噉然不爲所污辛未轉南京禮部尚

書公在南都禮曹事務清簡公餘得縱讀國初所藏
秘書於是所見愈邃清暇肆游江南山水大放厥辭
如雲日光潔雖片言隻字爲世珍重士林往往以不
得公辭翰爲恥甲戌公考滿例贈祖考禮部尚書給
誥命廕一子送國子監讀書乙亥改兵部叅贊機務
公自條宿弊以明舊章數事曰嚴操練以修武備禁
役古以肅軍政禁冗員以寬民利買戰馬以振軍威
定船差以便進貢修船隻以便差用遂爲定規時島
思藏傳聞國西有童子記其前生事者以爲活佛
上遣使迎之公上疏極諫其事有傷國體且言國朝

聖教
教建
官事
無事

聖止
聖止

繼宗相承以不絕番僧朝貢者不遇騷厲遠夷而已
非崇奉信惑之也 陛下天縱聖明無微不燭抑豈
不知西方異端佛教無益中國乎南京御史林有年
以言事被逮公論救以爲御史朝廷耳目之官凡政
體民隱皆當言之其言善則微婉將順而無悍訐之
失其言未善則憤激太過而少和平之氣雖言有不
同原其心皆忠於 陛下非爲身家也近奉聖旨差
錦衣衛官校挈解來京中外聞之罔不驚駭豈以諫
官而被逮失禮御臣下之道耶疏上遂得釋 上巡
狩無時宜大之地往來數矣又復事於關陝以伐虜

爲名公上言天命人心累數百言無不剴切是時前
星未耀中外危疑公疏乞早建皇儲以安宗社不報
已卯寧藩宸濠告變刻日東下欲取留都公預爲賊
守之具一時草創皆備率九卿臺諫額天誓以死守
城門設文武臣各二員率軍以守城中暗設軍二營
以防不虞未期濠預遣死士二三百人潛入留都伏
於鼓樓街攬頭某人家爲內應如期而發守備太監
劉瑯實共謀之公廉知先縛攬頭一掬而知之多執
間諜以次而擒梟首江岸都城獲安賊計少阻而公
江防城守甚多嚴備華聞賊至安慶爲安慶守備楊

銳敗之濠怒曰安慶一撮爾尚如此况南京乎且聞
喬尚書甚有備將如何也乃殺方士數十人賊退兵
是夜西北風惡甚舟纜盡絕比曉至鄱陽湖遂爲中
丞王公乘之不戰而敗先是公視機務時密得濠反
狀又知指揮楊銳有才略可用乃署爲安慶守備誠
之曰安慶南京上游也密通江西賊計汝必先知知
則速來告我賊至必先攻安慶攻則汝死守之未幾
賊變作銳果成其用公之功於是爲大設使安慶無
銳順流而下焦爛者多豈能成殄滅之功哉較論公
之功當又上賞終以爵不酬勞天下惜之先是濠變

分布僞檄畱都諸臣不敢上聞公獨密遣官馳奏時
上在西海巡獵覽奏回內遂謀親征十二月上南狩
至則叛逆已平遂受朝正於行在初有旨命百官以
戎服朝見公獨以爲兩京禮儀一體豈容有異遂朝
服率諸臣見時倖臣江彬以權寵勢談傾人欲謀不
軌公以雅量鎮服其邪彬始欲構公使人撫其事卒
無所得駐蹕既久宸極爲虛公倡九卿臺諫凡三上
章公獨伏闕上疏勸回鑾輿以安定社稷爲計九月
上還京師公扈從至揚州歸辛巳五月公考績錄公
前功加柱國少保太子太保七月詔拜吏部尚書辨
改保

論官材總統百度至於君子小人之際尤加意焉中
外翕然稱之 今上皇帝入承大統新政之初銳意
圖治甚倚重於公公亦忠勤靡倦知無不言言無不
盡革弊興廢公力尤多上疏請早視朝以隆聖政蓋
爲人君法祖憲天莫大於以勤而治天下臣工莫不
交相慶幸 上遂嘉納焉壬午 今上御極之初命
侍經筵 上親耕籍田與行九推禮幸太學釋奠先
師孔子時預分獻禮畢復至彝倫堂命祭酒司業講
書 賜坐聽及 賜茶而退癸未王會之期裁革冗
濫至四十餘員宿垢積汗廓然爲一新春三月廷試

天下士公爲讀卷官夏偶病休沐上遣內使賜劑

米瓜果三次復遣鴻臚寺慰問甲申公以議興國大

禮凡三抗疏乞休遂得俞允歲給人夫月米馳驛還

鄉有司以禮存問公歸樂平始買地建宅徜徉於山

水中至朝廷之事多不言及辛卯鎮江少師還蒼楊

公卒公門下士也挈舟渡江弔之及過江之日江南

父老識公者舉手加額曰活我公也多遺之以禮不

受十月歸偶感痰疾卒春秋六十有八公少從少師

楊公遊公遂爲高弟旣舉進士又從文正西涯李公

遊益肆力於文字間其所友者皆一時之彥德行道

學

龍漸磨者深焉公居清職雖少煩劇餘暇必友會作文而性命道德浩如也自今北方之士言詞苑者必公爲首焉爲文不蹈襲爲工出入六經深沉醲郁自成一家有克蒙藁若干卷其爲詩始擬古作後擺落陳辭往往多自得語樂府雄雋有漢魏風識者以爲渾然一代大家之作公嗜山水嘗歷雲中上恒霍登嵩華海岱太行及江南名山搜奇摘隱人莫之及通家猶有二李風晚精鑒賞名書古帖一見卽知性淳儉所用皆陶甕之器衣服恂恂與寒士角而延接儒雅如恐不及見善如已出見不善義形於色卒之日

天地晦冥陰霾集霰布滿城郭數十里之內樹木盡白識與不識言之多有歎息泣下者

叢說

喬白巖叅贊南京機務時方寧藩謀逆聲言取南京兵已至安慶而白巖日領一老儒與一醫士所至遊燕兼以校奕實以觀形勢之險要而外若不以為意者人以為一時矯情鎮物有費諱謝安之風

武宗在南京江都督所領選卒軀幹順碩臂力拳勇皆西北勁兵也白巖命於南方教師中取其最矮小而精悍者百人每日與江都督相期至校場中比試

南人輕捷跳趨行走如飛而北人龜坐方欲交手被
南人短小者或撞其脇肋或觸其腰胯北人皆翻身
倒地僵仆移時江提督大爲之沮喪而所畜異謀亦
已潛折其二三矣

武宗南巡時喬白巖爲叅贊機務寇天叙爲應天府
丞時缺府尹寇署印太監王偉爲內守備三人者同
謀協力持正不撓故保南京無虞不然禍且不測
寇亦山西人與白巖同鄉軀體碩碩眼微近視每日
帶小帽穿一襖坐堂自供應朝廷之外一毫不妄用
若江彬有所需索每差人來寇佯爲不見直至堂上

方起坐立語呼爲欽差語之曰南京百姓窮倉庫又
沒錢糧無可措辦府丞所以只穿小衣坐衙專待拿
耳差人無可奈何逕去回話每次如此江彬知不可
動後亦不復來索矣

王偉太監是小時與武宗同讀書者時適爲南京內
守伺武宗呼爲伴伴而不名從小相狎唯其言是
聽遂得從中調護故喬寇二公得行其志是雖適然
之會亦可以占社稷靈長之福矣

武宗在牛首山經宿江彬欲行異志而山神震吼達
輅彬懼不敢舉事次日歸抵聚以門時已深夜江

傳旨開聚寶門迎駕白巖堅閉不納是夜 武皇宿
於報恩寺若白巖者鎮重不撓真可謂以死衛社稷
者矣

江彬所領邊卒驕悍之極行遊市中強買貨物民不
堪命寇府丞亦選姪矮精悍之人每日早晚至行宮
祇候必命以自隨若遇此輩卽與相搏邊卒大爲所
挫後遂斂跡亦所以折江彬之謀也

武宗在南京行宮諸司朝參時景前溪爲國子司業
景腹大而矮幾不能俯頗失朝儀江彬卽大聲問曰
第幾班第幾人是某衙門官若司業亦是該拿人數

白巖卽應聲曰是南京國子監堂上官遂不拿問蓋
出於白巖一時權宜而能全朝廷儒官之體古人
云此人宜在帝左右

資政大夫吏部尚書偲菴楊公旦傳

江汝璧

吏部尚書楊公者太師文敏公之曾孫也名旦字晉叔別號偲菴祖錫考仕儀皆贈至南京吏部尚書祖妣詹繼劉妣周皆贈至夫人初仕儀公之娶於周也三月而姪公公姪七月而仕儀公疾且逝又三月公乃生公之生也伯叔父有夢鳳棲公舍者曰是兒也其將紹文敏公而起乎迺公甫髫齡果穎異絕倫十七補郡弟子員二十四而領鄉薦益成化癸卯也丁未落會試遂卒業於大司成丘文莊公大奇之弘治

大原
業不
再展

庚戌登進士第二甲一名授吏部驗封司主事卽見
重於太宰三原王公歷陞考功郎公風采剛方品藻
精確卽科道顯貴人罔敢干以私兩秉述職之衡黜
陟惟允時太宰青谿倪公性嚴毅慎許可顧獨器重
公繼青谿者鈞陽馬公也尤峻急難近公每持正議
初若相迂卒乃避公言嘗考察京職有佞夫被黜責
緣奏辯者有 旨再覈實馬公倉卒拜命欲改擬以
從公毅然持不可曰 祖宗來未有此例且倖門一
開後將謂何都御史浮梁戴公亟是之而馬公亦悟
竟獲罷再覈之命甲子陞太僕少卿乙丑改太常正

德丙寅乞恩歸省蒙路費寶鏐之賜丁卯起復逆瑾
欲一要見公公不見遂以違限例出知于溫溫海邦
也地大物衆務劇奸藁公治之不遺力郡以大治時
瑾之偵邏旁午州郡吏苦其誅求皆慄慄焉公獨慎
靜民恃以安公平生守已端潔自謫宦以來大書上
帝臨汝毋貳爾心于座右僚吏遵度不敢縱永嘉令
王獻臣者以御史謫茂視前守逮事公則敬畏獨至
焉居溫二年庚午起爲浙江副使督學政會當鄉試
公以五閱月週迴數千里所校士允愜公議若拔竄
波增廣生余本於久屈之中是秋竟高薦明年廷試

請育
宗室
繫天
下心

及第至今浙士夫猶服其精鑒辛未逆瑾誅又起爲
應天府丞尋進尹順天順天素號繁劇難治公治就
緒貧民有負內供不能償者公請以贓罰并帑藏之
羨者以代仍禁縣吏無重科巨寇劉六等流劫近畿
又四方流民荐食京師道殣相望公因募人爲叢塚
收葬之人多感泣壬申陞南禮右侍嘗攝國子監事
士心歸焉時先帝在位已十餘年矣而皇儲未
建公與司馬涇川張公宗伯白巖喬公議請擇宗室
之賢者育於宮中以繫天下心二公欣然會九卿具
疏以請上雖不果行人稱其忠尋轉禮右侍掌大

常寺事裁抑浮費民力賴以稍紓丙子改戶侍奉

勅總督京通等倉時總督監督中貴人多公剗剔奸
蠹持正不回屬官倚以爲重而中貴人久亦自服丁
丑西羌賊犯順甘肅繹騷廷議推文武大臣總制三
邊公奉勅督理糧餉所在充足開中鹽課以其餘

均給三邊及賞賚哈密有功人哈密人謹戴上恩

誓不敢負文敏公爲學士時扈從文皇帝西征故

嘗過此公忠信感孚威惠翔洽甘人舉手加額曰是

大賢輔之後也莫不遮道登瞻以獲識爲幸尋陞都

察院右都御史總督兩廣軍務兼理巡撫時嚴枉道

之禁公念母老疏請便道展省 武皇帝允之且錫
紵衣羊酒寶鏹等厚賚公抵家綵侍彌月亟戒行抵
任乃肅紀綱飭武備省刑獄汰苛濫百度燦然一新
會番禺清遠河源等縣蘇峒十八山滴水巖青龍岡
帽子峰等寨徭獍負固稔惡所過大肆焚掠民甚苦
之公乃調集官兵分道並擊斬級一萬一千有奇俘
獲四千一百有奇奪回虜掠男婦一百三十有奇牛
馬輜重不可勝紀捷聞璽書褒獎兼有駢蕃之賜云
已卯秋宸濠之變南贛撫治都御史陽明王公咨公
援兵卽發兵備僉事王大川未昂都指揮歐儒千大

經整兵以行仍會總鎮總兵檄副使汪鉉都指揮董
禎達官都指揮馬英率驍勇五千繼之而鉉意不欲
乃鼓浮言以惑衆公恐其敗事遂改委僉事王大用
統領直薄南昌前後凡七咨王公又咨巡撫湖廣都
御史秦公云西江之變正臣子竭忠效命之時况順
逆邪正老壯曲直之形昭然明甚逆黨可刻期而破
因選漢達兵三萬餘將親率以往焉尋得報元惡已
就擒地方底定遂罷行田州府土官知府岑猛者思
恩府土官知府岑濬族黨也弘治間濬亂猛降級指
揮僉事因功陞指揮同知貢緣奏辨覲復其官會龍

州知州趙源亡嗣襲以姪相猛因黨其妹所立假子
韋璋者賂京還驛使詐傳詔旨起兵遂與璋襲破龍
州逐知州趙相乃賂遺本兵及當國者猛圖以功贖
罪復原職璋圖冒趙宗奪龍用請托於公公執不可
當國者廣人也子弟素與叛人通而本兵司馬擅作
威福巡撫者歲有厚餽公獨無二人交怒嗾巡按廣
西御史曹珪誣劾公公素清謹吏部爲之駁白誣竟
不行未幾聞母周夫人計奔喪歸先是巡按御史汪
珊特薦公賢有丁憂都御史楊旦操履端純學識閎
雅誠士林之高標縉紳之翹楚等語今上記注之

壬午公服闋遂起公掌南院尋陞南戶書公甫洊任
又改南吏書甲申秋吏部白巖喬公致仕廷議會推
公 俞旨又改公以北公具疏力辭 上不允會見

山桂公羅峰張公以傳奉陞學士公亟率部院諸老
上疏論列語極激切用是忤 旨遂爲給事中陳洸
所誣劾并及東閣大學士吳公一鵬吏部右侍郎某
公偉疏下吏部議時左侍孟公春覆題亟辯其誣且
曰此必奸邪欲竊三人官故洸爲之開路因發洸奸
私且請有所懲罰以警將來竟有 旨令公及汪公
俱致仕既而公論大譁科道交章辯公之誣論洸之

好者無慮數十人公抵家坦然自適放情於溪雲山
月間以詩酒自娛而科道之論薦則未少置朝野士
大夫企公一出以輔中興景運而公則自惟暮齡高
位盛滿宜戒遂不復有用世意第聞 朝廷用一善
人行一善政則躍然喜藩臬郡邑或一事失中一民
失所則愀然不樂公之忠義固天性然哉初成化間
宗黨避難業籍沒比公貴乃力雪辨竟蒙 恩復如
初文敏公祠雖立而祀未虔乃相劉守與疏以請卒
如南陽李文達公例春秋祀焉

光祿大夫少保兼太子太保吏部尚書贈少傅

廖公紀墓誌銘

李時

公諱紀字廷陳別號龍灣世居閩父瑄商於東光因家焉公幼有至性好學不喜嬉飲爲樂成化庚子領京闈鄉薦庚戌舉進士登第時屠公總憲風裁炳著少許可公觀政屬下獨器重逮程銓柄首疏公爲考功主事公亦節介不渝期副所薦鄉有士將遊仕途奉贊謁冀蒙二天公不辭旣完璧克驢以歸其清而不激類如此歷遷考功郎中再轉文選雅不阿時宰士類高之陞太僕少卿太常卿皆有實政紀錄擢

工部右侍郎督理易州山廠時歲羨餘將萬金公一無所染悉以 上供所用因以爲例陞吏部左侍郎既而擢南京吏部尚書頃又轉兵部叅贊機務凡勞權所役奪之俾盡還伍戎政用肅因人言求退章再上獲允家居踰兩載召起家爲吏部尚書公感激益自磨淬值修 獻皇帝實錄受命總裁事竣進太子太保 賜鞍馬金幣丙戌請老 上不奪其志加少保給人夫月糧庸示優遇仍 勅乘傳歸旣抵家日惟杜門研索古義嘗著庸學論孟管窺少業毛詩晚年尤嗜易公卒計聞 天子爲罷朝一日贈少傅謚

僖靖 賜祭九壇 命工部管葬 恩禮稱至士林
榮之

吏部尚書致仕贈太子太保謚文莊羅公欽順

神道碑

嚴嵩

有明宿德碩儒曰太宰整菴先生羅公以嘉靖丁未
四月二十四日卒年八十有三初公致仕天子特
給月廩歲隸以示優禮既登八袞詔遣守臣奉牢
醴及門存問仍加賜廩隸至是計聞詔賜諭祭命
有司營葬贈太子太保謚曰文莊蓋褒賢崇德之殊
數也君子謂惟公實克稱之公風格峻整雅操貞肅
進則崇節振邁而毗於國退則遵養純固而範於鄉
談道著論則言爲代之師反躬實踐則行爲物之軌

好學不倦不知其衰老之將至者耳公諱欽順字允升吉之泰和人少卽端重殊異年十四題其門有勉勉於仁義之語舉弘治壬子江西鄉薦第一明年入奉廷對賜進士及第授翰林編修每朝退卽閉戶讀書不事交謁已巍然有公輔之望擢南京國子司業正容端則六館以肅蘭谿章公懋爲祭酒深見信重事多咨公而行以父栗齋翁年高得請奉歸爾待久之不忍去因疏乞終養而逆瑾怒奪職爲民瑾誅復職由南京太常少卿陞南京吏部右侍郎改吏部右侍郎今上卽位轉左侍郎前後連攝部篆甄別人

才咸極精當時論稱重克實錄副總裁是時栗翁年
益高公歸養之志益切拜南京吏部尚書抵任卽馳
疏乞休便養 詔允之旣而 詔改禮部尚書未行
丁栗翁憂服闋仍以禮部起公未至復改吏部而公
具疏懇辭於是得 旨致仕益公審時直已不苟慕
榮利如此自是江右部使兩都臺諫章數十上無識
不識罔不冀幸其復出乃公則屏居却掃惟研精聖
業窮探理性患近時學者持論高虛不屑古訓簡約
是趨其流之弊將墮入虛誕作困知記若干卷其言
議精微衍與根極理要辯禪悟之學近理似是而斥

其毫釐千里之謬時習波頽我矧無易於戲道之不明智巧橫出古之聖哲罔不戒愼省察率諸終身而不足今之論者以謂圓明朗徹取諸一言而有餘其學術異同世之君子必有能辯之者考公平生自史館以歷國學則士行雍規由以丕變由奉常而陟少宰則官常國是倚之取平中更什抑秉志弗渝榮進屢辭去就惟潔然公雖蚤退而考論政務之得失究心生民之休戚固未嘗一日不以天下爲念也每平旦正衣冠升學古樓羣從入叙揖畢端坐觀書雖獨處無情容食恒二盞服無侈淫居無瑩榘讌集無聲

樂宗戚率之而興於孝敬鄉閭則之而化於禮讓子
姓僮孺罔不守其約而歸於謙靖謹飭初公昆季二
人並起高科季弟中丞先卒仲氏憲使公亦未老乞
休德義相淑怡怡如也方屬疾乃自作誌繼以二絕
皆正家之語疾亟舉手正巾而卒曾祖諱寧祖諱鐸
黟縣訓導父栗翁諱用俊由鄉舉歷任國子助教祖
及父俱以公貴贈通議大夫南京吏部右侍郎

太子太保吏部尚書兼兵部尚書汪鉉傳

太子太保吏部尚書兼兵部尚書汪鉉嘉靖十五年卒賜祭葬如例謚榮和鉉徽州府婺源縣人弘治十五年進士授南京戶部主事歷僉事至布政使陞副都御史提督南贛軍務 召還院陞刑部侍郎進右都御史兼兵部尚書掌院事提督團營加太子太保改吏部尚書兼兵部尚書十四年九月致仕是年七月卒鉉初以才略見稱折節取聲譽善窺時好爲取舍自僉事至布政使悉任廣東故因方霍以納交張桂自 上登極罷四方獻祥瑞鉉在南贛首進甘露

諸臣修明倫太典因標之卷末以爲上孝感之應
無何遂擢內臺掌銓衡大被寵任鉉有幹局內行修
潔執憲秉銓多所建論數汰去不稱任者朝廷爲
之肅然性傾狡好以智陰陽人主外示強直而內
以輒媚取悅嘗其蒙恩幸遇臺諫諸臣起而攻之者
亡慮數十人咸見譴謫有杖死者而鉉每遭論列輒
強辯自白指其人爲報復及後上亦頗厭之語輔
臣曰汪鉉邪佞詭隨其去留不足爲有無也鉉不得
已乃自陳致仕歸未幾而卒迹其行事殆漢廷張湯
之流歟

實錄

汪鉉婺源人也舉進士爲刑部郎比數歷藩臬威赫
然聲稱著當時從都御史陳金破江西寇又再從破
唐寇有功遷副都御史撫南贛鉉自爲尊官忽改素
謀比周賁緣新貴人以遲暮故賂資等其內深陰毒
人也外若爲癡直亡城府貌入理都察院進刑部右
侍郎遂遷右都御史大學士張孚敬新貴上敬任
之鉉日夜先孚敬意排逐忤已時當衆攘臂罵大禮
諸臣鮮顧忌也孚敬又內惡夏言寵因薛侃疏風鉉
繼言主使鉉卽削脅侃不應遂代款劾言下獄言請
廷辭得直孚敬罷上意以是益憐愛言鉉好辭行

謝言曰少傅實爲疏我不與耳且搆孚敬私求悅言亦止加太子太保孚敬復相御史馮恩因篲見露章論孚敬鉉人篲也而他復有所稱引鉉恨極奏逮恩下詔獄論上言大臣德政律斬親臨視蹴而罵曰奴更言我篲耶然恩竟赦不死而鉉亦久遷吏部尚書尋兼兵部尚書鉉旣領文武選威權震天下乃大收內饋遺從子弟豪其鄉奪家人田產萬計孚敬稍稍厭之而會有發鉉與夏言語者益大恚絕不見鉉計窮晨從候孚敬私第長跪堂下孚敬督駭曰何此態耶掖使起鉉不肯起而墮淚若有訴咽不得言者孚

敬悅尋進少保以給事御史交論罷歸老死鉉死時
宗黨數千人拆其舍立齋

太子太保吏部尚書北原熊公浹墓碣

張 鑒

公諱浹字悅之別號北原南昌人幼質穎敏博學尤精於易爲文詞清勁以儒上舉正德丁卯鄉試甲戌第進士拜禮科給事中持議寒謬一時權姦沮懾已卯宸濠以南昌叛初濠之異圖也綱公及御史熊公蘭至親爲質又陰結朝貴阻絕封事巡撫孫忠烈公疏七上不達公曰伐謀貴豫否則羽翼已就難圖矣一日公偕熊公密授草御史蕭公淮上之濠大懼洩露遂發兵反不再月果擒有儉人者因導武廟南

狩公倡朝臣累日伏諫不已奉 命查核松藩邊餉

總兵某者怙勢侵冒動以萬計公廉實狀聞寘之法

壬午 詔討求追崇典禮朝論準治平間安懿故事

公在蜀聞之抗疏論 今上承統御天弗緣所後而

禮濮國不得考於宋英今 獻皇豈濮國比哉反覆

以倫理天性辯之遂牴牾出補河南右叅議至則起

療招逋弭訟時部境寇作公曰安得以職守分彼此

耶卽勒兵捕之會外艱歸丁亥 召修明倫大典公

乞終制次年大獄明推都察院右僉都御史偕嘉魚

李公講求振刷臺憲一新明年陞右副都御史 大

典成轉左副又明年轉右都御史掌院事七月有
人命欲成於奏緝羅織者 勅下法司會鞠衆依違
公獨奮筆曰殺人以媚人弗爲也力白其枉旣重忤
中貴而忌公者因擠之遂罷免己亥 駕謁 山陵

經行殿名近直追論舊臣 上曰浹老成論吏部起

用尋陞南京禮部尚書句曲人王某者疏欲表揚朱

家巷以崇 國姓公曰天親不可以人爲今日久跡

淫涉牽合非禮也遂寢其議廷論避之庚子改南京

兵部尚書參贊機務考核軍政去雷甯材品人服其

公之奏減龍江淺船餘丁幫甲若干以甦困卒又禁

和買罷諸苛法畱都軍民倚重焉癸卯

名爲兵部

尚書兼右都御史掌院事公慎差遣無遠近勞逸一
撰於才力曰紀綱之地將以糾正官邪而先自枉可
乎衆志遂定有巡關者適警報托疾自逸公遣首領
促之竟無敢逾宿按歷有擅威福甚者必貽書令省
改嘗辯官民冤牘剖成案未嘗徇勢局甲辰改吏部
尚書公曰太宰天下所與取平者吾安敢臆決耶凡
陞叙無小大流品日與少宰安福王公華亭徐公及
司屬之賢者共焉每每注選必語所司曰此缺相宜
否如否雖十易之何害尤獎救寒峻惟恐其墮落臺

孫氏
其仙

孫氏
其仙

被謫

官自嘉靖初漸廣舉刺公曰非制也其病有司炫厥
市恩不免矣請凡中差論列苟非其專職無濫及遂
著爲令公在部院京察二外察一皆蒞以公嚴京察
惟黜其行誼尤無良者有直道被誣者公必辯救之
凡遇姦人傾陷善類公皆昌言正色諍而全之衆皆
懷服公宰銓逾月 上優以弼臣之遇乙巳公滿考
六年加太子太保母萬太夫人年九十公乞終養

上溫旨勉留 詔有司以粟帛存問曠典也公自是

殫竭忠盡於國體公議無弗侃侃者八月疏斥箕仙

之妄忤 旨公惶恐待罪至十二月固乞休遂遣官

之妄忤 旨公惶恐待罪至十二月固乞休遂遣官

校械繫以歸執坻役在田凡十年足跡不入城府每
見邸報知時事災異輒憂形於色尤以未報 國恩
爲恨每厭術數之學好觀程朱語錄求體驗以足臨
大政決大疑確有原本蓋以抗直任事以惠利救時
公識其大矣公歿於甲寅享年七十有七隆慶元年
今上登極詔復其官爵 欽賜諭祭并修塋焉惟
公始階大位遭際隆顯爲天下倚重及其脫屣而去
也天下莫不嗟然冀其旦暮復用而其逝也又莫不
嗟悼焉

光祿大夫太子太保吏部尚書贈少保謚文襄

唐公龍基誌銘

徐階

嘉靖丙午夏六月太子太保吏部尚書唐公病弗能
朝三上疏乞致仕上方倚公重以爲羣老忘君奪其
官放歸七月十九日公與出都門二十里卒於旅舍
有司莫敢以聞後年餘權耐觀山祖塋之側其明年
子汝楫舉進士第一人授翰林院脩撰又二年具疏
明公不敢爲欺狀詔復公原職賜祭葬贈少保謚文
襄於是上大夫相與戴上之仁明而幸公之有子且
以識天道之存焉公諱龍宇虞佐別號漁石浙江蘭

谿人祖贈尚書思州公與其子贈尚書璽嶼公皆以
文行爲鄉閭所推璽嶼公娶於鄭是生公公之在娘
鄭夫人夢獅踞門而向日及生日光正射蓀其貌儼
然獅也人相與異而傳之稍長受業楓山章文懿公
爲高第弟子弘治辛酉領鄉薦正德戊辰舉進士知
郟城郟於時荒甚使民得貸粟於官而薄其息禁豪
猾毋多賦却羨餘之賂吏者以佐轉輸民用不困大
盜起燕齊間至郟公督兵拒之斬首三百餘級賊怒
合其黨大至公發碗口長柄諸砲斃其統銳六十餘
人賊乃遁以功升俸二等服除拜監察御史出按雲

南上疏乞戒巡遊黜貴倖又數以法抗駁臣人爲公
恐公笑曰某職固然已卯寧庶人誅江西新免於兵
而歲薦饑公以選往按賑災卹貧疏連十餘上西人
以安嘉靖丙戌自陝西提學副使遷按察使驛作徒
數十人歲暮餓而逋有司當以越獄公悉縱衆感泣
輸歸使自齎牒投郡縣輸顧直以免無後期民有誣
其弟盜者獄旣具公佯執其妻訊之曰汝夫與弟同
盜法不得以免自言幸活妻懼以情告誣遂白丁亥
徵拜太僕卿尋擢僉都御史總督漕運條凡兵民所
不便大者奏聞小者立罷及召爲副都御史民爭繪

像祀焉擢吏部右侍郎轉左侍郎壬辰關中饑詔發帑金以賑而虜酋吉囊數寇邊天子爲之晏食遷兵部尚書兼右都御史總制三邊軍務兼理賑濟公馳入關奏平糴節用等十事民賴全活者二十餘萬人已乃簡戎伍飭器械明賞罰任梁震王効劉文諸名將以師三萬耀武陰山虜大驚北徙六百里甲午春虜犯延綏時震方援大同公趣震還而檄叅將任傑以兵出虜後合擊俘獲五十餘人其夏敗虜於響水斬首七十餘級秋吉囊自將十萬衆犯安會公使文迎敵而伏兵其傍戰旣合伏兵起乘之虜大敗遁歸

至興武効邀擊敗之至乾溝震追擊又敗之凡斬首
四百五十有奇奪夷器無算兵部上公功以爲昔都
御史王越擒虜四百餘賜爵伯尚書王憲斬虜三百
加太子太保官其子錦衣百戶今臣龍功殆過之宜
異其賞會執政有忌公者不報丙申改刑部尚書初
大同卒叛都御史東平劉公帥師討之將盡誅其黨
卒懼爲飛語中劉公徵下獄公言大同凡三亂輒戕
其帥不一正法無以令天下時論專務姑息以冀苟
安今罪源清邊人益得窺朝指矣劉公於是得釋劉
東山與其徒乘時爲奸利至構間兩宮株連貴近吏

坐獄不窮竟去者數十人公獨以抵法無所懾
廟成公條大禮大獄諸臣名以請得赦歸者二十餘
人當是時公風采聞天下而權貴多不悅戊戌夏乞
終養鄭夫人詔報可公旣去名聲益彰臺諫薦者章
三十餘上甲辰秋召爲南京刑部尚書以母辭不允
改南京吏部尚書會有邊警改兵部尚書鄭夫人諭
公曰茲所謂金革之事非汝將母時也吾偕汝行矣
乙巳春奉夫人入都公故習邊事以爲虜去來若風
雨而我收保恒後時故多亡矢檄諸邊修城堡遠斥
堠虜至持滿待之其秋虜果不得入自頃年來吏喜

以文法繩邊將其跡弛雄傑之才往往獲罪而柔佞
乃幸全公請宥諸在繫者使立功以贖廢錮者量其
才用之士聞咸奮太廟成加太子太保冬十一月大
宰缺廷推首屬公上方重兵事顧銓衡非公不可
疏留中一日竟改吏部公爲政兼論資望殊勞異能
疎遠必用而中才不得越次以進其有所用舍聚僚
屬共謀之衆議合然後署疏以請嘗舉廢棄四十人
皆時譽也雖不果用正論爲伸夏四月公病危又數
與執政議不合於是毅然求去馴至奪職以卒縉紳
惡之公性坦易與人處畢露肝膈而其意氣激昂慷

慨見者盡傾尤好獎拔後進士多賴以知名素善屬
文當其得意時長篇短章操觚立就莫不婉麗暢達
或戲爲奇深文難字至不可讀然終不詭於理所著
易經大旨若干卷漁石集若干卷雲南江西督府總
督奏議各若干卷傳於世公生成化丁酉六月十二
日享年七十配徐繼劉俱一品夫人子男七長汝器
國子生次修撰次舟舉人汝梅汝渭汝澧皆邑庠生
最少汝淮

題兩疏後解

漁石集

妻人錢寧雲南臨安人太監錢能鎮守雲南收爲家

人年十五六性機警雲南衛指揮盧和充錢能門下
頭目和善相一見寧謂將來必大貴顯私結無不至
諸服用俱出於和寧拜和爲義父後和陞金齒叅將
挾雙勘四平人死以火鍛其屍又強奪生員妻事發
問斬罪既錢寧竊柄乃爲和奏辯下鎮巡會勘和得
脫刑具散居都司直房正德十一年審錄官至寧陰
嗾出和之死且令奏事承差楊金齎書於察院龍當
堂裂而還之曰和詐爲耳審錄官果欲末減和范巡
撫沐繼兵史鎮守聞之愕然三司杭東卿朱升之輩
以有巡按在無憂也審錄官語龍曰盧和事皆無屍

當未滅龍折之曰四人無屍蓋和鍛之以滅其跡耳
若得未滅則天下酷吏紛然鍛人之屍矣吾實不能
今日未滅之雖富貴立至恐人云徇錢寧之意縱直
和之獄其將謂何審錄官氣沮龍喝卑隸輩將和也
於階下加刑具允以常刑送按察司獄撫總諸公輩
亟稱曰中流砥柱然自此寢不帖席矣至鳳朝明事
又危矣朝明被奏訐不得裝令惡從劉宜董溥談金
寶於京師厚賂錢寧不啻二十萬寧以言服總兵鎮
寧又寄語巡撫曰但了武定事便請往兵部朝明又
賄諸勘官文案具矣龍至巡撫首以此會龍不可駁

還其封客有爲朝明說者游揚其辭卒乃曰道長真
難得鳳家持萬金同半年竟無門可入龍正色曰卽
十萬直二芥耳斯言何爲至於我其人慚而去朝明
哀求於寧寧令劉宣董溥集雲南人在京者昌爲通
把勝詞衆保得內批襲知府實寧詐爲之也部檄下
行按察司時沈仁夫爲按察使查照上官真犯死罪
事例將朝明拘繫仁夫真丈夫也龍備鳳氏及朝明
罪惡與不當襲狀執奏於 朝雲南諸司與軍民人
人知之蘇天秀爲驗封郎以大義奏覆詞氣嶮然今
卿可想見得 肯朝明仍降土舍一方之刑威正矣

此身極危不敢顧也楊侍御用之雲南刷卷回武功
與康德涵大史道其事德涵性剛直歎賞不已龍督
學事陝西會德涵詢曰却美官揮萬金吾子也夫龍
謝不敢却爲題兩疏後以相遺兩疏蓋指兩事實風
朝明一疏盧和事得徑行未嘗有疏云

賁德大夫正治上卿太子少保吏部尚書贈太

子太保謚恭肅周公用墓誌銘 徐階

白川周公諱用字行之吳江人也少以文有名弘治壬戌舉進士拜行人司行人正德初選南京兵科給事中後九年改禮科給事中當是時士大夫重內徙得輒動色以賀公獨曰南於我便乃復以爲南京兵科給事中 武皇帝好佛遣中貴人迎大寶法王於西番公上書諫甚力已又論倖進諸大臣及鎮守江西中貴人不法其身引而南其所論奏顧侃侃出北臺諫上久之遷廣東叅議督兵討賊之逋誅者凡幾

九百餘人平其寨十有八猶以前敢言功不得錄
今皇帝卽位天下士有聲實者率起爲大官公於是
得浙江副使未幾遭母憂服除改山東副使整飭臨
清兵備爲捕盜格若干條盡臨清之境不敢入遂遷
福建按察使故事鎮守市舶中貴人日給食三山驛
費錢若干公勅驛減十二且曰吾將以漸盡去之踰
年遷河南右布政使歲被 詔發內帑以賑會汝寧
分守缺公輒自請攝事盡罷俗吏所爲具文苛法全
活甚衆事聞超拜都察院右副都御史提督軍務捕
斬劇賊若干人已而曰民之爲盜非得已也夫事因

有源不窒其源流終不可得塞徒多殺人父子兄弟
何爲移書屬邑薄賦稅平徭役緩軍餉之徵行期年
盜果不復作 召還理院事晉吏部右侍郎轉左侍
郎尚書有所引薦失宰相意而尚書因與宰相比因
謫過於公詔南京刑部右侍郎公終不自辨後兩人
相繼罷去卽拜公南京都察院右都御史遷南京工
部尚書工部市物於民吏受賕率先給直而故緩其
入點賈者因據以爲利公令民有物得自輸輸已校
之直罔後弊頓革改刑部尚書 九廟災上疏致其
任嘉靖二十二年癸卯公自吏侍去國至是十年矣

而 上益明其賢用御史薦徵拜工部尚書總督河道數月改督理漕運未至以爲都察院左都御史士之干譽喜進者傳聞望見不待戒以絕明年當考察堂官公廉得其人賢不肖狀輒手書於籍又第其高下丹鉛識別之其改定或至三四苟賢矣雖讐不問苟不肖雖親有勢力必黜天下服其公又明年滿九載加太子少保賜寶鏤牽羊上尊其秋太宰唐公罷上若曰 孝宗時舊臣而賢者誰乎於時公廷推在第三特召以爲吏部尚書自近歲來郎中於爲政專尚書至不暇有所可否而侍郎邇相踵以噤不語

其
其
其

爲知體郎中者其智與力困則盡以任吏於是銓部
之政幾由吏出公將有所舉措必謀兩侍郎兩侍郎
莫不樂爲公盡而郎中亦遂以簿書任其僚吏不得
爲奸私故公之典銓不嚴而肅公素強及爲吏部勞
然以新被命勇不自顧惜疾遽作會冬當大計羣吏
之治胥曰此重典也吾不可以病自懈晝夜取部使
者所上籍閱之又採輿議品薦其賢不肖去留之疾
如刻丁未春正月僅訖事以某月十九日卒距生成
化丙申九月二十二日享年七十二公性孝友而薄
於嗜慾歷官四十餘年恒不以家自隨人餽之物卽

素盡見之輒不憚故其卒也至無以市棺教諸子
徐嘗候公其子國南竊語于寢食狀公目且瞑遽呼
曰兒母及外事其不亂如此曾大父諱景芳大父諱
瑄父諱昂連兩世以公貴贈資政大夫南京都察院
右都御史母計封太孺人贈夫人配施封孺人先卒
贈夫人子男四長卽國南以公廕爲右軍都督府都
事次兆南式南乾南公卒旣踰月國南以計聞之上
震悼贈太子太保謚恭肅賜祭四壇命有司治葬事
給驛舟歸其喪大臣之卹典於是乎備然而衆莫不
曰宜

聞莊簡公淵傳

汪道昆

聞莊簡公名淵字靜中鄞人也其先徙居石馬塘者
五世公始生別號石塘公生而莊不疾趨不苟笑卽
羣兒以狎侮至正容受之生八年夢一老父據石上
持公踵相公曰爾文王子孫也幸勿忘十有三年而
孤哀毀如禮世父遣公受博士易補弟子員太宰屠
襄惠公居里中部使者爲之樹表襄惠昔夢一偉丈
夫立表下自釋衰經授之旦日遇公與夢合弘治甲
子公衆於鄉時年二十五山陰人蕭鳴鳳爲舉首語
公曰文王既沒周以甲子興疇昔之夢徵矣明年舉

進士授禮部主客司主事正德初劉瑾亂政裁主事員改公刑部廣東司公孳孳治法家言文無害尚書鄒陵劉公在部大奇之會部中失囚公與同舍郎當坐時襄惠起爲中執法獨急公陰使人召公曰君來吾力猶能爲君地不然彼且齟齬君矣公謝曰罪在臣何敢抵邪大夫撓天子法卽無罪彼其如我何卒不往同舍郎浦伏謁瑾公委蛇自如瑾曰聞郎貌似夫子遇辱不驚固賢者卒謝罷公於是朝士聞之皆稱聞夫子反瑾逆節著割斷廷瑾睚眦廷中詞不服公操筆具獄數瑾曰瑾造符璽私蓄甲兵人

臣無將當大逆瑾語塞遂伏誅宗室寘鐠反 詔繫
寘鐠以下六百人公論罪輕重有差無不厭服大學
士丹徒楊公居太宰改公吏部員外郎遷轉考功郎
中丁丑當上計時朱寧用事諸所關說無不從貪吏
孫某張某賂寧幸得漏網太宰姑蘇陸公計未決乃
私語公二豪得寧寧能得 上卽議斥 上不從奈
何公對曰三載黜陟官守之謂何卽弗從守官可也
乃竟議斥有 詔從中留之公益以謬謬聞矣會禮
部校士公與焉舉馬汝驥等二十餘人多良士尋轉
選部益有聲會謫戍諸爭臣公爲部尚書具疏救之

不聽明年進南京通政司右通政居三年進應天府
府尹故事中官守備南京者往往受民詞檄下府幕
吏奉行惟謹期望必往謁籍公事未辦者受程期今
至語中官曰中貴人安得受詞幕吏安得爲中貴人
議獄非制也有 詔則可悉罷之嘉靖初永嘉張公
安仁桂公並以南部郎議大禮衆持論不合公獨然
之張公揭公幸得借公名列疏首公謝不可終不欲
勦說以結 主知及張桂名入京師詣應天請舟往
公正色曰 君命名不俟駕安得舟遊張桂自此嘆
公矣尋改順天府府尹勲貴諸豪舉皆斂手千里稱

平進太常寺卿 詔求直言上脩省五事 上納之

上齊宿南郊羣校有器者 上問左右謬曰大官

庖人 上命太常察器者以聞衆大恐必坐一二人

以應命公入奏曰百執事咸在昏夜莫之誰何請寬

之 上乃罷有頃進南京兵部右侍郎 詔求直言

復上修省五事公視部事薦武臣馬永等十餘曹其

後皆有塞外功稱名將及張公執政桂公任吏部尚

書會刑部右侍郎張公舉所知者桂公不悅曰此吏

部事執政安得侵官及桂公舉所知張公不可必吾

與若皆不便者乃以公補刑部右侍郎公旣入 朝

兩公且有德色面與公約退朝則飯公家旣兩公來
公卒未嘗治具兩公相目笑而去乃飯於其隣公遷
左侍郎歷三品者九載始進南京刑部尚書南京訟
故煩晨持牒者數十百人聚庭下公語諸郎曰守備
中官受告密侵刑部權釋此不問顧獨下行有司事
日治城旦書何爲乎自今民間大事必詣通政司達
刑部其餘一切付司城公視爰書甚或中夜不寢諸
子以爲請公歎曰此疑獄也少年文吏深入之吾將
爲之求生忽不自知其疲耳公始以尚書就道張公
囑曰僕往在南京刑部嘗題詩郎舍中公至願爲我

勒石樹公後堂公不答其後僚屬邇至皆爲張公致
叮嚀公徐徐曰此部尚書堂也紀法在焉淵待罪尚
書安敢以相君今日故爲郎官勒石卒不許張益以
此囑公 九廟災公有事 闕下乃從諸大臣自陳
不職張擬旨則以致仕免公 上曰朕方欲用淵淵
非老非疾奈何輒令致仕卒留之其後改南京吏部
尚書已亥嘗考察公務去泰甚無繁苛人言某子甲
多流言公留者何也公曰某子甲操下急羣下起而
中之假令其說行善者懼矣其後某子甲卒以清白
顯衆以公爲名言尋改刑部尚書從 上意也刑部

諸郎曹鮮事率以優游相高公至則以籍授司門籍
記諸郎入舍先後於是諸郎皆折節勤事公以躬行
先之日論報上十餘章無留獄若楚世子代庶人皆
以弑逆抵罪悉決於公歷二品者九年僅加太子少
保以不阿忤袁州相國尋復削之丁未公拜吏部尚
書竊歎曰使臣得先十年庶幾猶可自效乃今事權
去矣臣何能爲上書力辭不許尋上便宜七事務正
已以表庶官嘗問諸郎曰先朝太宰孰優對曰無如
蹇忠定王忠肅公曰固也耿文恪方可否事少宰從
左右贊一辭文恪宣言曰天子建天官一人耳安

得二天官邪宰正百官文恪近之矣諸郎退相語也

公無讓三君子司務某率其鄉人謁諸郎公聞其

狀司務堂下讓之曰爾是事天官顧不能杜門謝

請謁乃爲他人持羔雁布諸門惡用此於是諸郎惴

惴皆爲司務謝罪乃罷司務令得自新御史艾朴論

文選司郎中張舜臣公力爭曰郎中無罪罪在尚書

必欲罷郎中願免尚書以謝御史上以公辭直議

格每官其節儉出於天性卽退食尚書署十年著一

敝冠位置有常不失尺寸朝食及日中無加豆夕則

飲水一杯家食十餘年不問諸子生業公亥公以天

年終有司以聞 先帝輟朝三日乃贈少保蓋莊
祭葬鉅蔭部議悉從優制曰可汪道昆曰余始通籍
則庭調莊簡公其爲人閎廓深沉若涉北海不可爲
量當其持重不發不啻注一矢而引千鈞發則百步
之外無留行莫不命中余從諸公卿後豈不多賢要
以慎始令終名實純粹唯莊簡公一人耳昔仲尼之
徙雍可南面漢武得人爲盛黯獨稱社稷臣雍也以
簡黯也以莊公兼之矣知臣莫若主其信然哉其信
然哉

吏部尚書李公默傳

李默字時言少雋發有大略正德辛巳進士選庶吉
吉士嘉靖改元修漢代來功擬執政封爵公不可執
政銜之改戶部主事陞兵部員外郎大同卒慄悍公
兌馬往約束制之不敢動調吏部文選司陞驗封司
郎中開國勳爵劉誠意及常李湯鄧四氏革弊咸議
復如故真人邵元節以方術貴幸請誥封公論執甚
正中外趨之會天下計吏至令條便事加論次爲輿
地圖數卷尚書桂公萼表奏之世宗嘉悅巳丑會
試爲同考壬辰武會試亦同考官宴部議賓禮大忤

博士

等官

陳

力

任

時

以

不

知

定

已

部

代

家

代

司馬王公被劾不讓謫倅寧國府治行修暇則觀采
作郡志有愛徵祠歷陞太常卿掌南京國子監事遂
集六館生條教儀法皆度所易行著爲令教大治博
士等官得備諫臺選自公發之尋改吏部左侍郎奉
上命撰進士題名記秋虜大入寇京城嚴扃鑰不
開公守正陽門調營兵五千人畫守甚設而奏令開
門無困居人虜疑有備尋引去陞吏部尚書制冢宰
非部長卿有殊望者弗與公由侍郎徑陟異數也故
吏部率以疑事嘗故相嚴嵩得從中持之公於部
堅決莫能短長奏輒報可無有留端爲嵩地者遂相

三
代
郭
作
耶
也

卻會遼東巡撫缺公推張布政臬臬雖嵩鄉人而素
疏上偶問及嵩力言不當上怒因罷公歸既而
念公無他召復故位賜直廬許騎行禁中一日進文
札御書忠好褒異之時出府金幣徹御前饌賞賚甚
厚丙辰大覲公內贊穆清而外秉吏計兼聽並親主
斷於獨戒門下毋入一賓客同直大臣亦不得燕見
嵩忌公峭直不阿不相能而私有所庇又輒不得通
迺大志趙文華者工部侍郎也當浙直備倭欲攘功
視師及還報自施勞伐謂本兵在掌握公不爲引大
失望嘗部試科舉策問漢武唐憲及邪正辯因尋端

傾之密疏爲謗訕語 上怒命下錦衣治竟斃獄中
惜哉假令不死公是浸明上必悔而出公法且反治
恨其不能待也穆宗卽位南吏科給事中岑用賓等
疏其狀詔復公太子少保吏部尚書兼翰林院學士
遣官諭祭營築墓道卹典昭曠慰雪沉寃且以風勵
臣節焉

太子少保吏部尚書萬公鏜行狀 萬 浩

公諱鏜字仕鳴別號治齋世居進賢之折桂里生於
成化乙巳年十月二十七日中弘治甲子鄉試乙丑
上春官登顧鼎臣榜進士任刑部主事明敏果決大
學士遂菴楊公大奇其才曰此非刑曹可羈也乃擢
吏部考功司員外遷本部文選郎中一以賢否爲黜
陟雖親故略無所私堂僚咸畏其公明績推太常寺
少卿提督四夷館尋陟大理寺少卿陞順天府尹公
以地近 輦轂之下根本是托拱衛居先汲汲焉恤
其民隱均其偏累疏上五事一曰清鋪戶以均買辦

二曰專選委以均賦役三曰發公貯以均大費四曰

溥徵解以均雇役五曰蠲夫價以均恩例 世廟嘉

納之甲申丁外艱內艱繼之服闋仍補順天尹秩滿

陞南京都察院右副都御史兼司風紀臺院肅清學

遷南京兵部右侍郎以寬恤軍民爲固國之先務而

培養財力尤爲寬恤之本根遂疏七事其略則廣修

船蘇貧甲也處工料濟夫船也循舊例重差委也酌

起運省船差也清草場足課額也嚴點閱修馬政審

戶則均甲役也公上其奏准議行至今民賴之隨陟

南京都察院右都御史是時 世廟因葺宇之變詔

求直言公卽披瀝時政之大者八事一公推薦二辨
國是三審蠲除四通鹽法五裕邊儲六廣矜宥七正
憲體八先實務莫非有裨斯民斯世之心也疏上冒
干天威切責之譴歸田里家居十餘載引咎自艾
不治生業後湖廣貴州二省叛苗累撫梗化中外洶
洶旨諭推素有才識堪任大事者付之是時兩京
科道撫按交章薦敷併尚書毛公等具題蒙旨諭
禹鏜以右副都御史前去勘處湖廣貴州夷情公拜
命單車就道挺入苗寨分別善惡相機勦撫不閱月
王師奏凱山寨破竹渠魁殲擒斬首以萬計輜重器

械所獲無算而苗夷悉平公思醜夷據險防範宜嚴
復爲久安保治大計乃熟慮閑籌關係之重大者十
事陳之有專併職任添設叅將增重事權定撥戍兵
處補軍餉制御土官查補軍額團結村寨廣招屯種
設立互市開通道路伸達夷情禁逐流民存留駐罰
酌量派辦大 上悉嘉納焉迨今無苗患嘉靖乙丑
江西大饑於進賢尤甚公歎曰斗米千錢何以聊生
遂格所積之粟竭復捐所有金幣轉糴他處粟以繼
之而鄰之饑孺悉拯矣尋陞兵部左右侍郎毅然以
邊疆爲慮條邊務保治安痛抑輕事喜功輩厥後卒

如公言舉事者迄無成功矣繼擢南京刑部尚書時
本部缺侍郎員公進冊立中宮進 萬壽賀表遂膺
南京禮部尚書選寅典三禮罔敢不恪隨轉北京刑
部尚書公不敢當 陛辭懇切蒙 旨諭才望素著
司寇重任宜竭誠供職以副簡用等語遂拜職時有
疑獄廷平者不敢發言公議之稱 旨續有吏部尚
書之召公復 陛辭蒙 旨諭老成端重才望素著
銓曹重任宜盡心甄別人才以副簡畀等語公拜職
凜凜然惟以不克盡甄別進退之道爲憂自州縣守
令以至撫巡思國治安悉有議處之條欲重民牧請

增甲科之選不職是懲雖密邇如部屬者無所蔽庇
能是勵雖疎遠如邊陲者無所遺至京師有片板之
號以其正直無偏邪也累承溫諭命道行禮都城隍
廟賜彩段寶鈔異數屢賜祭器等物有差皆殊遇也
任歷九載考滿奉 旨加太子少保荷蒙 皇恩累
封贈大父母父母官秩男淳瀟先後承恩廕光前裕
後盛德大業何炳耀哉緣由關節不到重忤勢權促
令歸田奪其官優游林泉十有三載閣門養威重不
接賓客惟偕鄉耆英結盟詩社著文集奏議詩詞等
若干卷至嘉靖乙丑年二月初三日終於正寢享年

八十有一臨終時無一私語笥篋所遺惟圖書數卷
伏蒙賜諭葬祭

吏部尚書夏邦謨傳

吏部尚書夏邦謨四川涪州人正德三年進士授戶部主事調吏部陞員外郎以事謫運司判官歷知州按察司僉事至布政使擢都察院右副都御史南京戶部侍郎晉尚書巡撫應天總督糧儲剿平海寇秦璠黃良之亂加俸一等均江南賦額民尤德之爲立生祠召入掌戶部改吏部尚書致仕嘉靖四十三年七月卒於家予祭葬如例

吏部尚書歐陽公必進行狀

劉陽

公諱必進字任夫世家邑南之夾溪歐陽氏之先詳
文忠公所著正德癸酉鄉薦丁丑進士觀政兵部同
舍有癘疾者門無輟跡公視其藥既而視其斂人自
以爲不及初授禮祠祭主事歷員外郎中出爲河南
叅議又福建叅議四川副使廣西叅政浙江左右布
政使撫治鄖陽撫應天督兩淮運督兩廣軍務晉留
臺晉工部尚書加太子少保改刑部尚書復改工部
陞太子太保加少保乞歸不允轉都察院左都御史
轉吏部尚書以吏部尚書致仕中外四十六年越二

十二還云禮曹時分祀之議公疏稽典禮引援切實
其毀淫祠清尼僧少者有家老者不至於無歸太醫
冗員盡汰之藩參時河南運官至京師賃屋每八十
金公乃買屋一區以待運者自是運官歲至如歸憎
民間財類若此者左右轄時淹浙中五載而清聞馳
薦章七上撫治時有殺人棄之道傍者一婦人見捕
卒過急入而扃戶遂執婦人至訊之庭不勝痛楚而
自誣其夫獄成公獨疑務欲釋之懸賞竟得殺人者
公於刑矜惻故雪釋幽枉者不一也有稱禮部差遣
儒士者結菴武當爲國老祝福又大刻於崖石動多

諭分衆以其怙勢率曲事之公令毀石逐道士人快
之蘇松饑賑卹有方而活者衆縣官有盛供張者竟
黜之劾郡守與巡院異巡院以是得罪圻甸懷之兩
廣軍餉舊類解軍門公令入梧州庫而移文動支安
南內亂其族目莫中正率衆來奔逆黨范子儀謀挾
之以爭立因誘海東諸蠻殘州掠地者數年軍門出
兵擣其巢先是料賊窮必遁約交趾而遏之竟如公
昇黎獠毒珠崖乞師奉命討之前後斬獲數多面
縛者幾千人不三月班師奏功旣而南丹州官之族
僞稱岑韋串田州日逐主母瓦氏乃誅之田州寧夷

民生祀公縉紳先生有爲夷民勒石而祀之者曰公
茲一舉有南顧之紆有死事之恤有除暴之猛有存
孤之慈有辨僞之明云公初爲司空仇鸞正專擅請
造邊地管房造銅人面軍器公抗議折之遂沮前後
大工逢鼎革之會值建置之難竭心力受 上隆眷
賜賚至玉帶飛魚雷古和公論公於朝曰仰體 聖
衷下悉民隱酌物料寬人力禁科擾裁耗冒供輸估
值之類不畛域不膠柱至於量才分任虛心以責其
成或變出叵測有震撼駭愕之狀則又相機揆策委
「求濟而有假公規私者毅然持之陰伐其謀求利

國家不爲身謀云爲太宰風裁疑峻袁給事洪愈論
萬太宰者耿御史定向論吳太宰者皆拔之會夏旱
詔大計在廷之臣公奉命簡其不任職者數十人
卽日大雨旣而又拔其淹滯者若干人薦其可用者
若干人下至諸小吏凡有黜陟惟公論是視大夫翕
然稱之上亦以老成端慎褒焉公爲太宰僅數月
而計前後奏一品績詔遣中使齎賜羊酒寶鑑晉
勲柱國會禮部湛尚書若水應贈謚公以題請忤
上意上怒令致仕遂致仕歸公生弘治辛亥十二月
下三日卒隆慶丁卯九月初八日臥病一日而卒所

著有白雲山稿

吏部尚書贈太子少保謚莊肅胡公公墓誌銘

李春芳

嘉靖丙寅十月二十二日吏部尚書胡公卒於位

先皇帝雅意大用公而不意公遂奄然以逝甚悼惜之乃贈公爲太子少保謚莊肅遣祭營葬如制公諱松字汝茂栢泉其別號也世居定遠元末避亂徙滁遂家焉大父璉父江世有隱德以公貴贈兵部左侍郎祖母周賈母倪俱贈淑人弘治癸亥十月十一日實生公公幼卽嗜學家窮無所得異籍則傍借抄讀更輯古名臣奏疏締觀之喟然歎曰經理天下者不

當如是耶其志向已槩見於此云嘉靖戊子領鄉薦
已丑成進士授東平知州秩滿遷南京兵部員外郎
改禮部祠祭司進郎中陞湖廣叅議山西督學副使
進叅政以言事指斥權貴得罪家居者十餘年後用
言者薦再起公爲陝西叅政尋轉浙江按察使進右
布政使轉江西左遂擢公爲右副都御史巡撫江西
陞兵部左侍郎轉左改吏部陞南京兵部尚書尋以
吏部尚書召入方其爲州時州有巨豪劇寇前守累
不能收捕設法擒殪之民有訟必先諭之以理不得
已方置於法故民莫不愛公之忠而畏公之威至構

祠祀公焉其在留都時以部員冗職稍有餘暇卽參
經史求微詞奧旨叅稽考互必浹洽曉暢而後已且
曰爲學如儲積然儲積旣多水旱盜賊應用將不竭
矣及在湖藩職糧餉值湖壯叛苗鎮竄之變公紆籌
策親履行陣遂致蕩平捷聞特降璽書慰勞且有白
金綵幣之賜秋闈試士以公爲提調而是科得士爲
多其督學山西時公乃樹風聲明經術將以儲實材
爲天下用而士類亦彬彬然嚮風矣會虜酋入南地
抄掠民倉卒奔避太原太原城堅閉弗納公憤然曰
是非我赤子耶若何弗納弗納其奚用守爲守將懼

速納民民賴以全活甚衆於是公遂上疏曰虜之敢
於深入者以邊將選悞失於先機故也賞罰不得當
功罪不時審奸豪潛入虜地爲嚮道而莫之察帥臣
隱挂觔冒以捷聞而弗之究則備禦何由嚴而虜安
得不深入竊爲國家憂之謹上便宜十二事曰懲苟
玩曰堅障堠曰懷攜貳曰蓄孽牧曰慎任使曰利器
具曰廣間諜曰清耗蠹曰嚴備禦曰核屯戍曰預積
貯曰撫傷夷疊疊數千言皆切中邊計要害先皇帝
可其奏卽擢公叅政協守鴈關蓋知公可大用也公
文臣也一日起言邊事人固忌之而疏中語頗侵當

時用事者以故得罪去公家居築娛老堂奉二親別
構尚友堂聚天下諸書讀之又曰是文耳曷若侑一
二同志遊東南歷覽形勝當有脫悟處也時公同年
友羅君洪先唐公順之亦以言事廢二公並有志學
古者與入宜興山中盤桓究解而公之神已脫然超
上乘矣當是時言者以邊才薦公乃起公陝西駐平
涼乃條數十百事若嚴保甲均賦稅選伉健置常平
大都可爲經久計者其在浙將吏多飢軍食傳峙公
案發之贓巨萬人心肅然其撫江西適流賊不突殺
長吏公率浙兵千餘人倍道出賊不意悉殲之因議

曰豫章爲閩廣下流當受其衝莫若於要地增置城濠屯戍守先事而待之復減租稅理冤獄舉賢良黜貪墨民得蘇息乃立石頌德焉始廣西賊帥張璠者點慧黠獍爲諸酋最其巢穴連諸洞寨驅羣蠻時出寇抄邊郡苦之諸路討之數歲不能克至是悉平蓋公之功居多云公勲隆望重不數遷卽爲太宰公因獎恬退抑躁進擢用才儻以報稱德意而一旦遽疾不起矣年才六十有四公貌古行格一語不妄發至其建立廊廟大計則千夫不能奪也古之所謂社稷臣者非歟公於書靡所不讀然得其精意大義皆可

見之施行故事起輒應不假旁求探索如武庫之儲
百器畢具唯其所用至其所爲文出入班馬其大旨
本之程朱其體格則嚴而峻斯本深末茂者乎有奏
疏書記傳志詩文若干卷行於世

光祿大夫柱國少師兼太子太師吏部尚書贈

太傅謚襄毅楊公博神道碑銘 徐階

昔我 世宗肅皇帝神聖睿明旁燭獨斷選任羣吏
各稱其器能讒言遊辭罔間罔二策役指使動有成
功用克內奠方夏外攘四夷功德之隆上配 二祖
垂譽無極而其時出入將相文經武緯天下倚以爲
安者則少師兼太子太師吏部尚書楊公實爲第一
公諱博字惟約別號虞坡山西蒲人也舉嘉靖己丑
進士知陝之鹽屋徙長安徵拜兵部武庫主事遷郎
中故相翟文懿公奉 命稿諸邊以公參幕府當是

時宣大卒悍驕屢戕其帥公告文懿以便宜撫諭之
鎮賴無事至肅州屬番數百人遮道要賞文懿欲弗
予不能欲予患來者滋衆無以應公請文懿坐堂上
數以命使至不悉衆遠迎將縛以屬吏番人叩頭再
三請乃釋不罪而稍賚其首至者諸番感且畏竟不
敢復來文懿還朝首以公薦 賜白金文綺改職方
郎中公之從文懿起遼左迄甘肅行萬餘里具得其
山川陰陽士馬強弱怯勇民所欲惡之大端及在職
方虜數入宣大山西撫督奏報一夕十數上公懸度
立斷悉中機宜時出奇畫衆謂未必然已而無不然

肅皇將有討於安南公請先以文告及乞降請許

以自新因疏便宜六事 肅皇盡用其策益知公自

山東提學副使山東糧儲參政不四年超拜僉都御史巡撫甘肅初罕東諸屬番以避土魯番居肅州境上其後族類日盛強西人以爲憂而力莫能遣公詔語之曰若屬羈於此謂暫安可耳非所以計久遠也今自白城至金塔水甘而草肥吾爲若築城堡作渠塿給耕具俾往居之何如咸頓首曰幸甚公遂築城七計地與人置食用之器咸備以示諸酋諸酋躍呼徙出塞遠者至百五十里繫龍首等渠墾田三萬餘

立召民耕其中又請以巡按御史督學政西人由是
富而知學虜嘗大入士競爲公死戰斬首百四十餘
級 賜詔嘉獎晉右副都御史丁母憂西人遮道泣
留窮陬孤戍至今以爲尸祝仇鸞之未敗也公與總
督曾襄愍公論之徵下詔獄而時襄愍方議逐套虜
修東勝及故受降三城期並河以爲塞鸞與其黨詆
爲生事卒殺襄愍庚戌虜入薊薄都城鸞以勤王有
寵數毀公 肅皇知其情竟不能害壬子鸞殛死公
亦服除明年 詔卽其家拜兵部侍郎兼僉都御史
經略薊保二鎮庚戌之變虜竄道潮河川入議者爭

請爲備而水湍悍不可城公緣水築墩離立錯峙墩
置戍守矢石相及虜遂不復敢掉臂行其間秋 召
還提督京城九門故事歲七月輒分兵守陴如寇至
公曰此自疲術也亟罷歸其營兵不勞而費省冬詔
公總督薊遼保定軍務選士馬繕堡堞除戎器爲不
可攻以待攻無何虜寇古北口號二十萬連營百餘
里公身被甲督諸軍禦之虜屢攻不得入則併力攻
孤山堡夜攀堞登我軍斫其腕墮虜氣大沮 肅皇
賜公緋身衣出帑金萬犒士公宣布德威諸軍益
感奮殺傷虜無算已又募死士持火器夜驚其營竟

步隨五發虜聚自相蹂躪死比明悉遁去論功晉白
都御史兼侍郎蔭一子錦衣衛千戶明年虜萬騎入
馬蘭峪擊却之幾獲其酋打來孫 召拜兵部尚書
華加太子少保黜陟將吏人莫敢干以私丁父憂戊
午 召還本兵公方疏辭會虜圍大同右衛急 詔
公往援公乃墨纒出關虜聞曰楊太師至矣遽解圍
去先是右衛被圍久其將士固守無二心公疏請
卹條戰守及善後十事奏行之又築牛心等堡寨墩
臺二千八百七十二座濬大濠二長各三十里小濠
六十四交互聯絡虜左右顧不得騁而南晉太子太

保兼左副都御史虜酋哱素時以輕騎擾邊計擒之
斬其黨十五人分兵襲擊斬獲又若干人未幾虜入
薊州 詔公移鎮公畫地爲十區檄諸將分區拒守
而三耀武於邊諸酋震悚終歲無敢近塞者 召還
掌部事加少保權倖不便公所爲往往爲飛語中以
奇禍 肅皇悉拒不納更下諭褒美諸邊奏捷 賜
本兵金幣有加一品考績 賜羊酒授勲柱國又以
勲贈其先於是讒忌始息癸亥秋虜且窺薊前鋒陽
指遼督臣信之身走遼以禦公策虜詐檄止其行不
得手爲書三止之又不得乃嚴備京師而檄諸路提

兵赴 闕下後數日虜果踰牆子嶺犯通州烽火徽
御官諸邊兵望見馳入援一日夜雲集虜驚謂神乃
解去乙丑以一品再考蔭子國子生吏部尚書缺廷
臣首推公 肅皇難其代留疏一日念非公不足任
竟改吏部未幾 肅皇帝崩 穆宗莊皇帝奉 遺
詔錄忠諫舉遺佚公皆贊成之修平宸濠功復新建
伯文成王公爵 召諸舊德布在臺省郡邑長吏有
聲績增秩示勞不輕徙官一時所稱善政多出公請
丁卯一品三考晉少傅兼太子太傅再蔭子國子生
巳巳論事忤 旨會左右倖臣多毀公者謝病歸辛

未 莊皇寤 詔起公以冢宰行兵部事 今上嗣

統邊警益稀 詔公還吏部以一品四考晉少師兼

太子太師仍蔭子國子生賜賚甚厚癸酉分獻夕月

壇疾暴作扶歸上疏乞致仕 上不允加賜餼牢酒

米公又疏辭謂有不忍言去之狀三不得不去之情

三 上乃許 賜乘傳 命子俊民俊卿侍行至蒲

數月卒 上聞震悼輟視朝一日 賜祭葬贈太傅

謚襄毅蔭一子中書舍人公性明達事無大小一見

輒能得其微與其終所當成敗言於士大夫下至屬

卒無隱情談說古今品第人物敷暢該博聽者忘倦

蒞官臨戎應酬庶務雖甚煩遽意常安閒夙興僕朝
夜分計政不少倦怠亦無勞苦之色秉旄仗鉞鳴玉
曳裾頤頤昂昂人望而畏蓋其稟厚養完非偶然也
所著虞坡文集詩集雜著歷官奏議凡八十四卷生
正德己巳五月二十四日卒萬曆甲戌八月二十三
日壽六十六公之先出弘農華陰國初有諱善甫者
始徙蒲州曾祖謀祖選考四川按察僉事瞻皆以公
貴贈如其官曾祖妣張祖妣趙李妣田皆贈一品夫
人配段累封一品夫人子男五俊民嘉靖壬戌進士
太僕少卿俊士萬曆甲戌進士鳳翔府推官俊彥官

生俊卿隆慶戊辰武舉第一人管錦衣衛事指揮使
俊臣官生

光祿大夫柱國少師兼太子太師吏部尚書贈

太傅謚襄毅楊公博墓表

故冢宰楊公者蒲人也諱博字惟約系出關西楊氏
洪武中有善甫者自華陰徙蒲六世而生處士公諱
謨生留耕翁選選生舜源翁瞻瞻舉正德十四年鄉
試宦御史有材能聲仕至四川按察僉事公父也公
登嘉靖八年進士授陝西盤屋知縣調長安課治行
尤異徵入爲兵部武庫主事遷武選員外郎職方郎
中會天子巡狩承天起故大學士程公閣諸邊軍
務公叅幕府每過城邑山川輒登望觀其形勢險易

同土俗好惡士卒多寡勇怯皆疏記之至肅州屬疊
數百遮道要賞公言於翟公曰夷族甚蕃不予處生
變予則來者滋衆恐無以給不如以不遠迂責之令
其服罪乃稍資其先至者庶可無患從之諸番皆服
未至者不復來還奏事稱意賜白金文幣是時虜吉
囊俺答方強盛數寇邊爲患山西尤甚天子以廣
懲責本兵公所規畫能當上指在職方且六年所贊
畫甚衆如撫定安南及簡京營士卒往太監麥福不
能濫增勇士其議皆自公發之諸大臣方議遷公顯
秩公自以勲勞無稱力求外補遂出爲山東提學副

使後二年遷山東督糧叅政明年擢都察院右僉都御史巡撫甘肅始罕東屬番爲土魯番所逼入據肅州旣久邊民苦之公召其酋長謂曰若輩寄居此非久計某所水草美吾爲若業若輩豈有意乎咸頓首曰幸甚於是築白城威虜金塔諸城遠者去塞五百餘里近者百餘里諸番樂焉徙去男婦三千四百餘口河西屯田久廢以水淤故公請於朝令開荒者免其租故有租者十年而租貸牛種與佃者人爭應令因循龍首渠故道分其水勢開田萬餘頃簡練士卒謹烽火虜不得輒近塞嘗一大舉入率將士拒之斬

首虜百四十餘級獲輜重萬計進右副都御史明年以母憂還家公之在甘肅也總兵咸寧侯仇鸞者兇悍貪狡大肆虐於民民爲之語曰誰能有盱將軍剗之誰能有腦將軍掬之公會總督曾公銑疏發其奸有詔徵鸞下獄會執政者與曾公有他卻鸞因上疏自訟曾反坐法已而鸞暴起爲大將軍氣燄甚熾時時欲洩憾於公未得也後鸞以通虜事覺疽死其冬天子乃召公爲兵部右侍郎明年轉左侍郎兼僉都御史經略薊州保定二鎮是時薊州新被虜患諸城堡皆殘毀公以次修築又修故巡撫洪公舊業相

水勢建名墩數十塞潮河之險還提督京城九門諸
罷諸屯兵都民便之頃之出總督薊遼保定軍務是
歲冬虜擁衆大入薄古北口號二十萬烽火通於京
師 天子愆往事殊憂甚日旰忘食密遣親軍使者
訶諸軍戰守狀而公擐甲乘城督將士防禦虜奪墻
三四攻不克乃併攻孤山兒塞驅其衆緣垣上以矢
射城上人而公立矢間督守益急竟不得入使者還
以聞 天子大喜賜公衣一襲發內帑金萬兩犒將
士公乃申明天子恩德散諸將士人人感激勇氣百
倍與虜相守八日虜不得利乃引退數舍猶徘徊未

卽去而公募死士持火器夜入其營驚之竟夕四五
發虜衆相蹂躪衝搏旦明遂倉皇散事聞進都察院
右都御史兼侍郎蔭一子錦衣衛千戶卒所以受知
天子深者以此功也明年虜以萬騎入馬蘭谷公督
大將周益昌擊走之未幾召入爲兵部尚書尋加太
子少保是時分宜父子方招權利諸司爲所撓不獲
舉職公至一切格不行分宜大不悅會公丁父憂歸
冀公不復用矣後二年虜入大同圍右衛城總督徵
下獄本兵大臣亦被論去 天子思公於服中起爲
兵部尚書旣而大同圍久不解議者亦以爲非公不

可於是遂命公往而虛部中位待之虜聞公至引去
公以右衛死守無二志上疏列其守將尚表之功因
陳善後事疏凡一二十上築牛心諸堡塞爲墩臺二
千八百七十二濬大壕二欄馬壕六十四五十日功
報竣 天子大喜加太子太保兼左都御史呼素數
寇邊以計擒之斬其黨十五人出奇兵襲諸虜營虜
徙帳去乃築故總督翁公所創長城列上修邊四事
大約計費金二十萬請戶部者十一天子又益喜謂
輔臣曰博修邊費少而功多較他鎮動以四十萬請
者不同也夫安費全在各邊耳誰肯言哉久之虜人

薊州塞殺略人民總督大臣徵下獄移公薊鎮時方
盛秋公聞命卽日赴居庸諸畫區守令約日時同舉
火相應自居庸距山海旌旗千餘里砲聲震天如是
者三虜驚終歲不敢近塞然公威素著塞外故能先
聲後實以勢禁之他人效者虜弗懾也是歲召還加
少保初分宜當國不便公入屢沮止之而天子不聽
竟有是命分宜父子大不悅及在部中議事又多不
合人皆爲公危然天子殊深知公卽深構不能奪也
嘗曰自博入聞胡奴日伺邊外及戎政大臣缺又曰
安得更如博者其見重如此一品滿三年授柱國并

贈三代尋詔食正一品俸明年謀者言虜當入薊州

公移檄邊塞謹斥候無令虜得入而總督某者乃東

巡遼陽公聞之拊几曰兵敗死矣日夜十餘檄趣之

旋而虜已潰墻子嶺入矣略居民燒房屋京營軍乘

城火光燭大內公夜宿部中前後上三十餘疏虜尋

引去是時華亭徐公當國素知公力言此敗非公罪

而天子亦念前功不過也一品再滿三年詔蔭子一

人入太學明年改吏部尚書未幾莊皇帝卽位大

興羣吏公掌其事自以宿德重臣負天下之望遂極

意罷諸不職不避嫌疑論者藉藉科臣遂疏論公以

所罷無山西人爲私 天子知公忠誠無他不直科
臣怒削其籍而公顧上疏申救乞薄其罰言者竟得
外補人亦以是多之後二年一品三考加少傅兼太
子太傅歷一子入太學公疏辭蔭子許之又二年以
議留屯鹽都御史龐尚鵬有詔詰責公遂謝政去後
二年起家以原官掌兵部事明年 今天子卽位召
公還吏部公爲人魁梧豐軀體神氣揚果敢有膽臨
事敏達長於應變其再起兵部也署事者以公將至
案牘皆謙讓未敢判叢積多至數十公至一日盡剖
決無留滯者人皆驚服是歲滿一品四考加少師兼

太子太師蔭一子入太學會上兩宮徽號贈公三代
如其官明年八月奉命分獻夕月壇未成禮疾作上
覲乞骸骨 天子不許加優再三遂稱篤乃許馳驛
歸逾年竟以疾卒計聞 天子輟朝一日賜祭九壇
遣官督兆域贈太傅謚襄毅蔭一子中書舍人嗟夫
天祐皇家則必遺以碩德之臣遭險而愈彰履盛而
不溢若楊公者殆將其人與結髮立朝歷官四十餘
年而親戎事者十之七虜東則以公東虜北則以公
北虜所責成皆他人所已敗則虜亦展轉相避折衝
之功沒矣偉矣近世能有兩哉及其據上卿宰天官

贊兩朝維新之治則拔忠賢抑浮競勲名又赫赫振
於前業益有光也人之言曰權盛者權功高者權此
以語常人可耳若公者寧可以此槩耶往公之令長
安也故太宰代州王公適自陝西督府趨京師公往
謁焉王公曰君善自愛將來功名不在老夫下卓犖
樹立蓋自筮仕觀之矣立功名者豈可以侔乎哉公
所著有虞坡集十卷奏議七十卷雜著四卷虞坡者
公號也配段氏累封一品夫人生男四人長俊民太
僕少卿嘉靖四十一年進士次士俊陝西鳳翔推官
萬曆二年進士次俊彥官生次俊卿管錦衣衛事指

揮使隆慶二年武舉第一女三人側室賀氏生男一人倭臣官生何氏生女一人男皆娶名家女女皆配名家子唯何生女尚幼孫男七人女十四人慶流於累葉盛矣

吏部尚書張恭懿公瀚傳

澹園集

張恭懿公名瀚字子文浙之錢塘人公始娠父贈尚書公夢胡端敏以冠服貽之迨贈夫人夢日當戶轟雷震天而公乃生七歲從塾師受句讀日誦累百言數請益塾師爲遜席者再陽明先生征古田道出武林公生十有六年耳紹介上謁陽明先生大奇之曰孺子可教也明年補郡諸生益發憤下帷徧讀古人書文詞敏麗試輒褰然首諸生籍甲午舉於鄉乙未成進上釋褐南工部都水司主事董造諸船往帥水軍者藉口材不中程務持郎短長有所指索公爲發

其姦狀於是氣沮不敢言會 章聖皇太后梓宮南
祔道大江公具舟逆諸真州貴人故索什物難公公
相機立應之中貴人竟無以難也 肅皇帝南巡擬
從衛輝舟還 詔頒式期五日辦大司空莫知所計
公閱諸樓船可移置者亟更新之飾以龍文丹彩晝
夜督理如期而具人以爲神已奉 詔罷不用而公
亦奉贈安人計奔歸矣歸則居廬讀禮絕卻壹切外
事服除補刑部陝西司主事尋轉山西司員外郎總
兵張達輩四人禦虜以衆寡不敵偵師繫獄久不決
聞莊簡公時爲大司寇公謂四人者壯士也能不死

虜而顧使死法乎幸及之寬政赦其不量於衆寡而
俾戴罪行間庶幾他日得其死力莊簡公然其言爲
請於上四人得出而達後爲都督果力戰以死時
同舍郎吳江沈子由金陵陳羽伯海昌朱汝一歸安
孫文揆孝豐吳峻伯並喜聲詩公與結白雲樓社朝
夕唱和不輟會廬郡缺守銓宰以三輔重地出公補
之甫下車卽葺宋包孝肅公祠爲文以酌謂孝肅風
裁節槩山斗百代乃世徒稱其摧折擊斷而未知其
有體要也故公治廬壹倣孝肅故事先教化而後刑
罰抵霍丘胡御史殺人大辟脫太學生方士二人於

監出部民陳邦於死一時翕然稱服乃若勸農盡
學校積渠水墾荒田繕津梁定徭役皆百世澤也
良德之建祠祀丙午公當入覲風戒行李候彭城
齊贈尚書公計第取絮衣一襲餘以付代覲郡丞服
闋補大名郡公守大名壹以治廬者治之庚戌虜酋
薄都門詔遣司馬耶一人持節徵畿內四郡兵入
衛使者馳至真定諸守相顧錯愕且難庭謁禮躊躇
久之公聞報以募召遊食儻附飽颺不可用披所屬
籍精選丁壯三十之一卽令三十人治一人餉得精
銳八百人馳謂諸守此何時也而與使者爭苛禮乎

司馬郎誠不尊於二千石顧春秋之義以王人先諸
侯要使令行威振耳藉令傲然格使者令謂勤王何
請守色動遂俱入謁公首請使者閱師使者岬然曰
何速也比閱師則人人精銳絕出望外使者乃歎服
公文武才矣 廷議四郡增設備兵憲臣一人以尹
某領之尹貪婪甚入境不事事獨日強諸富人入貨
予武功自告身不者責令市馬必得賄數百金乃已
公勅屬邑凡尹有所索務白府毋得輒予東明令首
犯勅公立勅之尹志甚具勅兩臺及吏兵二部悉不
報而臺省交章論罷尹官矣公嘗入謁祁御史臺問

開州守治狀公厲聲曰開州廉而才公曷疑焉州豪
宦某守故抑之無乃以蜚語聞乎天監在上何可欺
也都御史改容揖公上公甫上簷楹忽墮擊向公所
立處故事郡守無升都御史堂者公升而脫於險都
御史歎曰天意也銓宰察公兩郡循吏陞陝西按察
司副使備兵潼關歲侵大發粟所活數千萬人亡何
遷廣東叅政從督府談公監軍征新會諸寇以大捷
聞直指蒲嘗按廬有睚眦於公至是按關中論公聘
調三年補四川憲副齋捧入京袁州胄子風公媚已
可驟遷而公置不聞也已乃遷福建叅政袁州敗轉

山西右轄直指潘者欲庇私吏不得撫公所釐正藩
司夙弊反中公疏上公卽治行當道復議調時陸公
光祖爲吏部郎爭曰如公者安得以浮議奪之且銓
部省各一人凡以采鄉評杜誣譏也祖與張同省稔
知其賢必欲調張寧罷祖然猶兩以請奉 旨得留

用尋轉陝西左轄踰半陞都察院右副都御史出撫
陝西公攷歷久熟諳西事固原防秋期滿當撤戍公
謂須冬防兵至乃撤不旬日吉能蹂米入犯防秋兵
出擊之斬馘五十餘捷聞本兵不爲叙陞大理寺卿
尋終南山饑民嘯聚當事者議勸公謂此屬迫於饑

耳檄郡丞單車諭之卽日解散入赴大理多所平反
陞刑部右侍郎再陞兵部左侍郎出鎮鳳陽督漕運
公覩漕政廢首疏申飭仍條爲五議上之先是河決
梗運道大司空朱公開新河甫成而運舟沈以百計
所虧粟不減萬石人人爲朱公危之公第引咎自劾
且爲漕卒乞免償 詔槩釋不問尋轉兩廣督府時
嶺南寇賊充斥曾一本豎揭陽楊子亮潮州林金大
浦馮成之各擁衆數千島夷又乘風入寇公殲賊於
揭陽弑其魁尋俘金已又轉戰海上奏捷比比 詔
賜帑金綵幣公獨以一本勞張甚繇左廣大帥選悞

偏裨不用命悉論如法而檄右廣總兵俞大猷馳赴
幕府指授方略會嶺募兵變殺一叅將自髡而走倭
公聞變卽遣中軍李峨馳擊之擒首亂并獲倭酋先
是言官阿政府意論公業奉 旨貶魯二級適左廣
賊平僅復原官功無所叙是歲以冊立 今上覃恩
公父若大父得贈如公官母若大母皆淑人胄子蔭
入太學公又上疏爲本生大父母乞貤封 國朝貤
封僅大學士楊公士奇少保朱公衡暨公三人蓋異
數也新鄭入相首起公仍撫陝西尋陞南右都御史
再陞南工部尚書 今上登極加贈父若大父俱工

部尚書母若大母俱夫人太宰楊襄毅病免 延
推擇三人殿公名以聞 上謂公聞望素著超次特
簡公辭不獲則毅然以正百僚爲已任私交請謁壹
切謝絕務在崇實政遴真才兩司大計舉卓異者二
十有五人請 上賜宴若金食殘者從速繫及司京
察亦如大計事所黜陟悉當材品一時銓路爲之肅
清 上愈重公凡園丘方澤祝牲攝祭諸大禮悉以
屬公考績加太子少保賜寶鈔上尊肥羜以寵之丁
丑江陵相父喪不解政忽傳 中旨眷留令吏部往
諭江陵亦自爲牘風公使留已曹郎請覆議公若不

喻其意者謂政府奔喪當以殊典卹之宗伯事也何
關吏部江陵復令所善客說公弗聽已有詔切責謂
公奉諭不復無人臣禮于是廷臣惴慄交章奏留御
史大夫名清介至不能自持公獨拊膺太息曰三綱
淪矣江陵益怒嗾臺臣劾公省臣繼之遂奉 旨

致仕公北面稽首曰臣老不能任國事然寧負相君
不敢負 陛下辭歸則遍謁祖墓新宋岳武穆父子
祠率里人歲時俎豆之內與諸從兄弟年七十以上
者爲怡老之會外與同郡縉紳年踰耆耄者二十餘
人徜徉山水間鵬詠談嘯聯翩鶴髮望之如羣仙然

論者以爲不減香山洛下云歲戊子去江陵敗已七
載 上念公舊德 詔所司月給廩廩之庚寅當杖
朝之年 詔所司存問如令甲公生平無病老益伉
健嘗語諸子曰余德不敢望端敏日惴惴焉唯負先
尚青夢徵之爲懼乃今名位相埒齒復過之何幸也
癸巳以天年下世計聞 上悼惜輟朝於是翰林臣
致謚謚恭懿太宰致贈贈某官太宗伯致祭大司空
致水衡金錢以葬而公之哀榮始終備矣史氏曰當
江陵柄國時推太宰兩都六卿間論次先公者十人
論推先公者兩人乃公特見簡拔人豈不謂江陵私

公其後九卿連牘留之而公獨持大義以抗脇之以
旨不動說之以客不動恐喝之以臺省不動乃知
公固非江陵所得私也公韻度灑灑人自以爲可親
乃大節所在廩然不可回奪此豈可以世俗闕者哉
故海內數十年望公如清鏞大敦又以爲巨川喬嶽
庶幾其復興與雲雨爲天下澤也嗚呼其尤可以見公
也夫

資德大夫正治上卿太子少保吏部尚書贈太
子太保謚恭肅寅所嚴公清墓志銘

王錫爵

今上萬曆中大臣之以清德著望受 天子特達知
所拔擢待遇皆異等而未竟其用以死者海內益有
三公諸城丘簡肅公檉瓊州海忠介公瑞與今昆明
嚴恭肅公清先是嚴公謝太宰事歸 上數問閣臣
嚴尚書病愈否會本兵缺則 特旨詔補公如楊襄
毅故事又 特使使者馳傳趣公行又數問閣臣嚴
尚書何時來已公疏至具言臣實病且廢不勝首丘

私念以負 上惟 上哀察 上不得已停筆欲署
其奏久之方許比越歲 上優禮歸老重臣又首晉
公太子少保給廩米與夫無何計聞 上若曰是惟
予萬里親臣贈卹故事外宜有特加於是閣臣議端
僖恭肅二謚以請 上又特旨點用今謚其終始注
春殷繁款篤尤兩公所未及云公字直甫號寅所其
先五代祖名子敬者自浙之嘉興徙居滇祖高父春
塢公鏌以公貴得累贈至資政大夫刑部尚書祖母
董氏母余氏俱夫人余夫人生四子公最少而咄咄
奇悟鄉先達光祿施公昱擇壻得公以女歸之嘉靖

癸卯舉於鄉明年成進士除富順尹富順故劇邑或以調公此未淬之劒而輕斬蛟斷犀耶公謹謝曰小子何敢抑余劒也乃方在治中惟工之所鑄而擇利可乎至則能聲大騰以救荒課爲天下最丁母憂服除邯鄲其治如故操尋召入爲工部屯田司主事歷員外郎郎中督修外城及九陵皆斤斤謹出納侵牟吏膠手所省費以巨萬已工成當叙陞公辭不受受加俸丁父憂復除兵部車駕車駕主行郵政以清強敢任怨坐忤出知保定府會歲旱多盜公政先保災歲旣漸熟乃具爲條教劇俗飾蠶犁然有理故

事三輔郡歲籍民充京師庫役公議罷之至今稱便
居保定三年課復最歷陞易州兵備副使陝西叅政
四川按察使卽其地轉右布政使所至自撫按特舉
及兩京臺諫會舉不下數十疏隆慶戊辰擢都察院
右僉都御史巡撫貴州尋改四川公故川吏知其民
所疾苦乃具籍川課之當輸京者議割二十萬金就
近改給陝西軍餉罷郡縣卒之團操成都擾民者貢
番入邊則爲定限額數額外不得浮一人他約束一
切以惠利爲本而痛持豪家悍吏以法以是士大夫
譽誹常參半而內江趙文肅公獨深知之會有以流

盜誅公當落職趙公力爭得予告候調候調五年起
督雁門關不果改貴州入爲南大理寺卿尋改北歷
刑部吏部右侍郎陞刑部尚書上之知公自其在
刑部能執法不徇權勢始旣柄用典銓則日夜討故
事論官材丞掾以下皆親爲標署楊遵彥之默識黃
次公之至精不能絕也中外吏師其廉儉直牘之間
幾無一跡上孳孳以太平屬公且未艾而公病歸
矣歸之日遣使慰勞仍賜馳傳以萬曆庚寅薨於家
距其生嘉靖甲申得壽六十有七公性儉厲勤於事
其操行嚴於趣舍辭受尤廩廩所居官身自與僮僕

食麤衣敝蕭然也橐中裝雖圖書琴篴不取諸人暑
王幕公使使致扇鉅微餉而不受初拜尚書食不能
具服色束素犀帶以朝其輩類或指戲之公釋褐時
玳瑁七品帶故在耶公笑曰不然夫犀帶不裝金安
知非玉吾顧恐難爲上耳蓋公之內行公潔與海立
二公略同而二公喜豁刻標異稍闡於大體乃公獨
蕭然長者色溫氣和人無賢不肖貴賤皆禮接之其
亭法處議本人情計久遠無崖岸峻物之行謹咋抵
掌之談以故明主眷遇尤渥而海內至今稱大人
之能安國家鎮雅俗者必首公云

於叙次多處詳述
改修

吏部尚書贈太子太保謚恭介陳公有年行狀

孫 鑛

陳公諱有年字登之號心穀餘姚人也其先居弋陽
宋建炎初左僕射康伯以太學正扈從南渡道餘姚
之開元鄉命次子祥家焉數傳至寶一徙干瀆村地
有塢今云壩頭者是也寶一生祖二祖二生裕三裕
三生文仲文仲生孟昂無子以弟孟善子巨理爲嗣
有孝行是生右副御史省齋公諱克宅公父也既貴
贈祖父及父皆如其官祖母嚴氏周氏母周氏皆淑
人云都憲公配唐淑人生四男子長有勲光祿寺署

正次有濟庠生次有孚衡州府通判季則公公幼敏
慧九歲能文十歲鄉試程論出意有不善輒竄改呈
都憲公都憲公斥曰孺子何妄耶然心實竒之是歲
都憲公卒壬寅兵部追叙都憲公貴州功蔭一子爲
國子生時仲氏早歿伯叔氏皆已入冑監乃以蔭讓
公云俟登第仍歸伯氏子公爲文師古昔不襲時調
壬子舉順天鄉試第二壬戌登進士授刑部主事慎
刑獄以讀律爲業孜孜討論其意暇則仍讀書丁卯
滿三年調吏部驗封主事戊辰調考功念淑人老請
告歸無何太淑人遺疾卒以瘠如禮辛未起原官壬

申晉員外郎尋調文選萬曆癸酉晉稽勲郎中調驗
封會成國公朱希忠卒其弟希孝援張懋贈王例爲
請成國兄弟自嘉靖來親近用事家爲金穴凡宰輔
及中貴靡不厚結託而是時希孝以左都督掌錦衣
衛事有權尤爲中人保所倚重其爲人恭謹相張亦
剖心任之張與馮密兩人皆睚希孝希孝亦樂爲効
力所請無不得於是冢宰方缺少宰署事公曰王爵
下帝一等可倖得邪遂具草曰按令甲凡功臣歿公
追封爲王侯爲公其子孫襲者非奇功異能生死止
原爵累朝遵之無敢越也正德中英國公張懋子

乞恩本部執不可再下府部議皆謂不可卽希忠父
輔亦不敢謂可後懋雖得王然不可爲例今希忠歷
事三朝雖不無勞績可錄然不過曰扈蹕曰督戎
皆臣子常職實非有奇功異能也生前被寵已踰今
豈可復膺殊典贈王不宜少宰江陰人而朱氏賜田
在宜興素有連又受相君囑意將以會議依阿之稍
易疏末數語公力爭少宰不悅立削去改語以公原
草覆上 詔下竟王希忠公卽日移病或曰一事不
得卽去邪何硜硜也公曰不然郎官與宰輔異宰輔
總百揆或可忍小以就大有年職在司封封外無職

矣今有王封而不得爭復何冀乎子休矣吾將行吾
硜硜矣乞休不獲則以病請楚相恚曰此子噉名者
當遂其意世固不乏才也因許公歸終江陵在位十
年不召甲申起稽勲郎中調考功又調文選時權相
已敗衆正拔茅進而公推轂尤急若都御史海公瑞
者海內所共稱正直是汲長孺蓋次公之流然當路
甚忌之公掌選乃起浚至大用焉公廉節數著自入
銓司愧遺無所受至是則書問亦絕權貴請託皆不
行選法清謁選者各自以應得何官不賄乞勢囑也
乙酉擢太常少卿尋收提督四夷館丙戌晉右僉都

御史巡撫江西敦儉朴欲以無事安民而嚴飭諸吏尤重懲墨吏綜核詳密巨細無所忽其餽人取諸公費不足益以餽金自他所來餽者不能拒則貯之邑庫未幾卽如數報之後來者亦復然而以前所貯餽之多寡互裒益當之邑庫常餘一餽而周流不絕嘗曰吾與施報可無恨獨行李往來不能無溷郵傳以此耿耿耳 上需陶器甚急歲增額數千且多奇巧公再上疏極諫雖不見聽然爲量減十之三丁亥江西歲半侵公復請盡蠲其難成者千五百器并留南昌魚課 上皆允之又爲勸輸平糴民少蘇焉戊子

江南兩浙大侵 詔下賑恤仍令無遏糴然守令客
爲其土謀其私禁販易者固多有惟江西大弛禁以
奉 明詔糴者雲至重舟銜尾而出而徽人尤衆穀
亦旋匱會霖雨麥荒則穀價益踊民困不能支而外
販者尤不已公私咸憂之或曰時適然耳 九重未
易聞也或曰可陰示以意令郡邑自爲計或曰令
狙僭執等昂徽商之直而無令出境公曰是何言也夫
知民隱而付之無奈何忍也陽奉 詔而陰開之欺
也忍欺非字民之實也夫患不能弭變不能權無庸
以撫臣爲贊矣故度有餘則當遵 旨以惠隣度不

能則當明請以安衆度緩則當候 命度急則當急
請而便宜以行遂上疏自劾并陳濟急六事其四議
羅維略曰我 皇上軫災閔匱爲天下慮德至厚也
江西去歲恒風害於穡事寧州等十九州縣災已甚
矣餘雖薄收然較之往昔亦減損以故場工甫畢市
價卽增臣等恪遵 德音不敢爲厲禁計江省之穀
自秋冬以來所協濟隣方者不少矣乃今穀日翔商
日集輿情岌岌其土之不能給而焉取餘夫當稍盈
而閉之則病人也迫縮矣而闌出無限則自病也臣
以爲本省州縣宜仍貿遷無禁其外販者權行諭止

庶驚疑少定而異日之空乏可無慮是亦仰體 皇
上軫閔之精意也疏上徽商大窘其鄉之御史遂以
違 詔論公會有主之者而羣閹亦素不便公公遂
罷己丑公廬煨干火乃市一故樓構之居室家而身
寓羅巖寺中庚寅起南右僉都御史提督操江兼管
巡江辛卯遷協院左副都御史尋擢刑部右侍郎改
兵部以平虜功增俸一級壬辰改吏部會余伯兄擢
吏部尚書而會稽羅公萬化方爲左侍三人皆同郡
公又同邑乃引嫌上疏避以非故事不允尋轉左
南院右都御史癸巳大察京吏與銓宰溫公純等同

心精核所熟皆當人翕然稱服目疾具疏告會轉南
吏部尚書又告皆不允伯兄請告歸廷推堪吏部者
四人公居末 天子特簡用焉自 高皇帝罷丞相
以政事歸六卿吏部爲六卿首其任尤重 文皇帝
雖設內閣諸學士然惟參謀議而已故委任蹇忠定
猶在二楊諸公上至 宣皇帝後三楊位益尊而繼
蹇者資淺因稍退遜於是請寄行焉後王文端忠肅
繼之職守復正顧視忠定時終不逮矣自茲以還時
有低昂要不甚相遠至分宜在閣久而權始失至江
陵而始自爲真相視部如屬也然江陵有術每往請

者必不自言必使請者曲迎其意有不合亦姑陽應之或其人大齟齬乃諷鷹鷂擊焉不則遂攘之爲恩其見擢者亦竟不知爲不出江陵意也又素留心人材腹中富有所品騰每在司銓者上往請者欲詘之良難故其柄常若獨操者先時掌選者常告余曰隆慶戊辰巳巳時益三相江陵末也然凡有大除授多待江陵而決余曰豈以其勢方張乎曰不然此公有斷且藻鑑明所論多中的故每每從之夫能長百人者必才兼百人者也豈不然哉江陵死職掌漸復舊至平湖陸公光祖爲冢宰益以強執行之先伯兄亦

踵之無改諸司郎皆皎皎爭淬礪然止可及嘉靖初而已尚不能如弘治以前也而執政者不達江陵所以能收權之故徒習見近日之事謂銓司之不能以江陵事已也遂大望公節槩山立即江陵不能屈諸公益憚之益謂吏部非吾徒徒貌相與矣公視事即止息於公署以朝房見客諸中貴聞之人人自失因各肅門狀命胥人謁於公曰公自潔如此仍許以情白否公謝曰敢故爲名高第中外一心使朝廷清如止水不亦善乎皆曰諾自是片楮不及門矣公持衡如掌選時務別邪正明貪廉更加意崇退讓至若

媒取術進世之所謂講搶攘必痛抑之卽庠及仍積
遲焉時無錫顧君憲成爲選郎與公意合一時人情
願廉望治甲午會余署刑部有中官盜銅料獄忤

上意 旨下一司官皆謫而中有不與事不列名者

內閣爲請 上宥之仍命如此例者許所司復請而

前歲文選郎王君效削籍時疏亦未經列名公因緣

比以爲請 上怒曰此乃新令前事何得妄請姑不

問公方病謝客因引罪乞罷不允無何 詔會推閣

臣且命無拘資品公因推七人舊尚書大學士王公

家屏爲首而內有余伯兄及左都御史孫公丕揚

詔下切責謂不宜推吏部尚書都御史因命以前二
次所推諸臣俱疏上公遵旨疏上而前所推有李公
世達亦左都御史詔下用陳公于陞沈公一貫而仍
切責謂何復列李名且云未有旨命起用閣臣何妄
疏列意蓋指王也公勿問司官俱謫雜職公乞罷因
請宥司官不允又疏乞 詔溫留且謂久在告無與
會推事不必引咎先時閣臣皆會推間有傳 旨自
嘉靖末年以來則傳 旨者多然會推之例不廢陸
公在部時曾執奏謂閣臣宜會推 上允之自是無
傳 旨然前兩推皆留中不下至是始簡拜二公陳

前壬辰所推沈今所推也乃次輔某公輩復有疏謂
相臣宜特 命不必廷推公因乞罷歷陳始末曰臣
不能多記近年楊巍爲尚書臣文選郎中會推閣臣
六人今元輔王錫爵卽是年所推也臣籍餘姚前有
兩閣臣弘治時謝遷嘉靖時李本皆係廷推其官皆
止四品而吏部尚書耿裕聞淵皆列首推今 聖諭
先以名望繼以不拘資品意甚盛矣臣敢不仰承
聖意臣擬王家屏等七人皆時屬所望又謬以孫繼
孫丕揚爲不拘資馮琦爲不拘品及後奉 旨通列
名上今推繼丕揚旣刪去矣其李世達實係二十年

初次所推臣安敢道

詔下再譙讓臣深懷懼焉

事始末皆臣所主臣本愚劣重以病憤前疏中業已

言之遂以清朝爰立之盛事自取 聖明督過之大

譴臣卽褫職且有餘愧 皇上乃姑舍臣而獨罪司

臣夫雨露霜雪皆天德也臣不復爲憲成等惜願臣

能覲然已乎嚙咨之義自堯舜以來迄於 昭代不

廢卽 先朝卜相非盡由會推然未有以會推爲詔

者至臣之身而以爲詔此不在法在臣匪人耳倘嗣

是而其說遂長使相臣或由他途進則臣之罪大矣

猶不允是時內閣王公亦上疏申救謂 聖意淵微

卽臣等不能窺測何況諸臣 上終不聽已又盡削
選司諸臣籍公嗣是益哀懇稱病篤 上眷留不置
遣中官賜養羊上尊公請益力至疏十四上乃賜告
令乘傳歸仍命有司候痊日以聞將召用焉公杜門
凡六月屢告不允凡正類靡不願公少留以爲 上
幸知公但留一日卽吏治清一日卽訕身以濟世爲
公甘之問疾者皆婉致意相知數輩尤反覆極論皆
莫能回公意余嘗私謂公曰公去甚善然於今有二
大事願以累公公曰何事余曰自楚相敗諸得罪者
皆起好名喜進之士多附之然非之者亦繁有徒兩

家漸成黨兩黨相角是非日以雜出持衡石而善消
之是在公矣今仕路以建言爲徑徑多岐也如使其
果無他腸惟冀暫淹而驟伸此猶可耳今乃或持以
劫上慮見斥則以先發博奇此訟師之靡豈宜使常
得志執矩矱而默移之是在公矣公沈吟良久曰當
深念焉居數日余又往公曰前所教恐難行余請其
說公曰凡建一規摹其前後必期相應也故必君相
背相孚所言如響然後可以酌向背審低昂圖轉移
之機今循例以請猶多違阻乃欲遠算深計逆方張
之燄而豫折難明之隱譬如置棋者一不應前後皆

誤矣恐黨將益熾而徑將益啓也此以俟能者我則
安能余亦無以應公是時公內戚亦有爲公留行者
公謂曰如君言出矣第循我故步能如志乎留者默
然公曰然則必須少貶矣吾去志益當決矣竟去公
在部尤留意廢棄諸賢每月必推數人殆無旬日間
者比後稱病猶疏薦不置其於內閣終始無毫髮徇
王大夫私談者咸以爲涉太激卽余亦慮以爲太激
然公所舉惟茲數公有不下顧旬月間亦問一下餘
雖率皆報可內閣諸公亦俱相敬重竟公去無失色
其後繼公者懼忤上意取厭且以爲旣知其必不

用又奚爲名取之於是諸賢悉罷不推而於內閣亦
深加調和中外皆以爲庶幾都俞之風太平可冀乃
不半載扞格愈甚卽叙遷者多不下謁補者或終歲
得至資乏假貸無所得而猶困守邸行取乃停數年
於內閣輒以惡言相報復至會推則諸司雜舉銓司
取充位益壞決不可返乃知道一而已強執無大假
借無小枉尺者直不能寸故寧身使貶法必不得使
貶公葢早辨之矣機決則矢飛隄決則川流欲巧持
之曲障之惡能濟哉嗟乎自吏部守正以來人皆謂
閣部冰炭故一人而白黑互出一事而甲乙錯陳右

閣者無論已臆斷者或曰晉楚爭長而宋鄭受其敝
盍各降意以和衷焉嗚呼此論權耳未引繩於義也
夫辨官者察行審材不得以消銖兩者也儻內閣而
所舉者皆是材品皆當其官此固銓司之所禱祀而
求也白簡在旁流言在下夫豈敢以任私當抗節之
奇哉今不審流品不參月旦見一缺出輒以所偏與
者擬之已收其實而使部當其名有不應則曰權不
在也善宰天下者固若爾乎今欲兩降意也其誰先
哉矧我太祖不以尚書隸中書省也本意在不令
相掣若不能守正而視眉睫以曲伺人意是失官矣

且非獨今也唐宋有中書省其制亦云四品以上降勅銓除五品以下則吏部專之彼時侍郎四品而宰相亦祇稱同三品然則降除者固無多耳今制亦彷彿如此卽通者內閣辨疏亦謂自庶卿上猶得與聞則勅除之意固不廢也乃并欲取其柄盡操之耶或曰如此則吏部不幾專權乎嗚呼此江陵相語也凡專權自有地吏部係分職卽爲有司五部事俱不關涉精神不貫趨附者必不堅故守正則已設欲行私非與內閣深相結藉其聲勢必不得逞也故內閣能黜吏部吏部不能搖內閣今冢宰奉身退者屢屢矣

而內閣安然如昔也謂吏部權能居內閣上哉夫官
人者與衆共之者也 先朝已事具在果登進者皆
賢也孰爲閣謀孰爲部議夫既有主者則委之吏部
宜耳卽或不然執大義調 旨以詰之豈不可淄澠
涇渭其誰能淆焉故曰莫相憎于膠漆莫相愛於冰
炭故造父不爲車奚仲不御部具疏而閣擬 旨此

成祖相鈐制意也人主親吏事者昔猶非之而必
欲以鼎足懷天官事哉不明於義而惟以權爭恐政
術將爲天下裂矣公出都行裝止書一篋衣一笥冠
紳二事見者莫不歎息好事者至欲繪爲圖歸仍寓

羅嚴寺中讀書自娛間與衡州公及諸故友詩歌相酬答食指漸繁則復市一故樓徙故址上而前剏軒三楹居常或在家或在寺敝冠澣衣不問者不知爲吏部尚書也其前軒繕治尚未畢戊戌正月十八日遘疾至二十三日卒得年六十有八檢篋中止白金三兩幾無以斂貸于姻戚乃克襄事四月起南右都御史先時吏部尚書鮮以他官起者間借起亦必用原官領之屠襄惠掌都察院楊襄毅嚴恭肅掌兵部皆仍冢宰銜卽公前一人南大司馬楊公成起掌南院亦仍故銜獨公以右都起蓋政府素嫌未釋名用

之實抑之也然公捐館已可百日矣浙撫按兩公聞
之急以請卹疏上 詔與祭二壇遣工部司務馬夢
吉治葬贈太子太保謚恭介錄一子入太學蓋仍從
家宰例云而都憲公蔭竟復與光祿公子啓孫今爲
袁州府同知公爲人廉直細行必慎余自幼與公交
未見有纖毫過清節聞於天下至取人則絕不苛責
有一善則力爲稱譽然主在辨真僞尤重大節寧取
有瑕玉砭砭雖瑩白弗眩視也好讀秦漢以前書刻
意古文辭卽小劄無不經意常有志全史余曰司馬
公通鑑唐公左編讀者皆未能竟何自苦爲公曰第

恐才謝左馬爾果勒成一家言後世必有鍾期未必
卽以覆瓿詭也然竟未克成惜哉宅兩經火著述稿
多不存今存者有奏議若干卷詩文若干卷

陸莊簡公光祖傳

曾同亨

陸莊簡公諱光祖字與繩別號五臺居士嘉興平湖人也陸自唐宰相敬輿之後世居嘉興爲望族公之祖光祿卿淞父刑部主事杲俱以公貴贈刑部尚書祖母王母沈皆贈夫人陸氏簪紱相承自光祿公以來連舉進士者三世父子兄弟並顯而公在父子兄弟中又大顯母沈夫人感異夢而生公五六歲時隣人許翁占公於應對間輒衣冠拜賀大母王夫人曰賢孫一代聞人嘉靖丁酉年十七與父刑部公同舉於鄉又十年丁未成進士逾年授涪縣令涪大名盛

邑近塞而衝民多轉徙公奏併五十里爲四十里以
甦凋敝又爲設法築城以拒虜工成而民不知勞趙
魏人多任俠自虜內訌草澤間多懷異志公募壯士
爲義兵自訓練居常爲不逞者得其主名咸置籍中
推心待之人人感奮願爲公効死未幾曲周李邦珍
反所過蹂躪獨畏濬先聲不敢入大司馬趙公錦檄
役三輔民爲邊夫築垣墻公具言不便狀致司馬怒
形之紕論屹不爲動已復言於直指謂必役內地民
莫若令出錢與邊民如雇役法直指上其議竟得請
人心乃安內鄉王奪民田封丘王遺蒼頭私販鹽梟

橫道路公一裁以法無少貸邑人有虛構者富而善
騷賦嘗有所忤於邑令令大銜之遂假事坐以重辟
歷數令避嫌不敢白公得其冤狀言於當道釋之直
指謂公曰構饒於貲耶對曰某能知其罪之有無不
能知其家之貧富直指語塞自是平反之聲聞於遠
邇凡四郡有疑獄上官必以屬公無不得其平者公
在濬四年薦剡無慮十數上例得徵選華要而以宗
人前贈忠誠伯緹騎帥炳方見親幸於上勢張其
因謀於相知請補南遂得南禮部祠祭主事時濬方
大校公自具疏請蠲得旨豁免若干及轉官公猶

爲邑悉心計畫而後就道南禮曹最號清暇時趙文肅自翰林起謫籍爲南曹郎公因得與趙及殷祭酒邁王太常時槐相與過從談說名理會聞沈太夫人病急請告歸嘉靖壬戌起家祠部郎轉儀制佐大宗伯嚴文靖公正伊王典模罪發太醫院吏目何雲龍等乾沒狀痛革諸王府襲封請婚諸濫費其他如方技并近幸貴戚非分陳乞並寢不行時肅皇帝諒言裕邸事先是憲懷太子薨羣臣不赴祭至是靖悼王薨公力持議乃得具祭如禮先帝知之密遣奉御梁某者遮公於道以致嘉獎又一年嚴文靖

改太宰遷公爲驗封郎旋歷考功文選公在驗封議
遞減吏胥頂首至今奉爲畫一在考功大計外吏覈
別精當人心悅服先是有名臣子當大計時屢托吏
議而當事大臣以先世故曲庇之公曰此所謂隳其
家聲者也安可復留以重其卑力請罷之及改文選
嚴文靖公益虛已委任一切惟公言是聽公受事念
田間諸老臣數十年不得起用乃合謀於徐文貞從
容調劑其間於是諸老臣如吳介肅胡莊肅毛端簡
王恭節諸公或自家召起或自外而內或自散局擢
要地一時大僚無有不得其人者到侍御陽以郭

起爲光祿少卿張通判澤以歲薦超拜雲南僉事典
史薛 掾吏也職陞 曰何可使進士科獨重

使他途懷才抱德者不得自表見耶已而劉侍御堅
不起天下高其恬退張僉事竟以死節聞人益歎公
負人倫之鑒不獨破一時拘攣之格以昭 國家立
賢無方之意而已故事進士考選庶吉士獨行於丑
末年公曰豈不由丑未進者獨乏才也自今宜每科
皆選於是隆慶戊辰首行公之議是科得人最盛舊
制外吏考滿拘於薦疏及旁薦正薦之別不及以特
徵 恩封者常多公疏稍爲變動其間薦不必三而

旁薦亦有得與正薦並論者至今守爲第令公典選
數月所注措皆翕然稱當然公以此得天下心亦以
此致忌口甫擢太常少卿而今太宰孫公丕揚時爲
御史以專擅論公竟削籍去家居六年佐刑部公捐
貲捐田行其德於鄉族之間者不可勝數時高新鄭
再起兼理部事頗修徐文貞舊隙里人間風誣訐徐
氏幾起大獄凡文貞親識及諸門下士盡爲默散公
日走吳下宜言於上下爲徐氏地事竟得寢自此遠
近益以此高公文貞每歎曰吾愧與繩亡何新鄭去
楊襄毅自兵部再還吏部聞公周旋徐氏事益心難

公卽日起公南太僕少卿隨超拜南太僕卿晉南大理卿甫就道數日忽心動因暫還里時刑部公病已篤日夕念公及公歸大喜又兩日而瞑公因得躬親含殮之事人以爲孝誠所感時江陵秉政專恣及奪情後益恣無忌臺諫翰林諸曹郎進士先後紕論相繼削籍論遣不少貸公聞而貽書規諷語甚切至先是江陵奔喪歸楚諸司無不會葬獨趙直指應元不赴隨移疾歸爲臺長所劾王員外用汲因論臺長語侵江陵江陵黨洶洶將與巨璫合重置王君於法適公入爲大理卿一言而解王君僅編管去及江陵

朝憾王之意未已公聞而排闥入見之委曲開導
乃已江陵故與公同籍雅善又以公夙望欲引公相
助而公每與語輒訥鑒所以曉江陵有人所不敢言
者江陵不能堪遷工部侍郎未幾御史某遽希指論
公公力求去家居多避跡林野不通賓客愛吳興陸
山之勝又喜其名築廬居焉顏曰大休以見不復爲
世用也越四年江陵沒用薦者起南兵部侍郎未上
改吏部至則佐太平登進才賢向得罪權貴去者一
時召起殆盡會議江陵獄與諸言事者意不合遂力
求解銓地遷爲南工部尚書而御史某入忌者言疏

論公時耿恭簡以副都御史佐院事上疏力陳公平
生大節御史風聞語非是自請罷留公以彰朝廷
惜老成伸忠直之意公出京阻凍潞河因赴友人蘄
遼總督張公之約往閱邊牆爲御史某所論疏下吏
部部覆公與張佳胤居常以功業相期許頃因阻凍
北過密雲與張某縱觀長城益留心邊計非徜徉山
水者宜留用以盡其才公復自疏求去語甚切至奉
旨促上任公竟還里舍堅臥求退乃得請越二載
起南京刑部尚書御史有誣奏司屬劉某落職者公
疏白劉寃得復原職明年改南吏部內監張鯨者本

巨奸恃 上親信招權恃寵公同耿恭簡合疏備陳
鯨奸惡狀擬置重典且救給事中李沂狂譴得罪請
寬恤以開言路公又再疏極言國本久不立由張鯨
多方變幻所致請誅鯨以謝天下早建國本以安社
稷疏皆留中不報最後復首倡南中諸曹中前議益
力有 旨謂不當瑣瀆然鯨亦從此喪氣不復敢入
內公遂以疾乞休 旨褒公老成端亮清望素孚不
聽去未幾改刑部尚書時李中丞材久困囹圄言官
累請寬貸不得公至適屆五載欽恤期公因上疏言
凡刑獄於法未當累經執奏未得 旨者嗣今客臣

等分別請宥以彰皇度以昭大典蓋豫爲中丞地
也會改吏部去不及終請先是上嘗列公名於御
屏間下書清正二字公之改吏部實出上意而諸
與公異者遂嗾二三御史論公公不與辯第懇疏求
去而已既屢辭不允不得已起視事銓曹近時事柄
旁落公至始爲振刷中涓請托盡拒不納而文選王
君敎又能與公同心秉公執法不少假借中涓銜之
後敎與二三郎吏竟坐是一日併逐去公上疏營救
謂百司進退事皆由臣而罪坐敎等臣心何以自安
因求去不允公在事杜餽遺禁私謁壬辰大計畢事

精簡廉吏二十二人以風吏治獎恬崇退拔幽振淹
不遺餘力先是閣臣嘗揭薦張趙兩侍郎自代公上
疏謂非 先朝舊規嗣今擬復廷推以重政本 詔
從之已而廷臣以會推日循 先朝冢宰推閣臣例
及公名而巨璫田義素憾公遂借此與諸璫合謀爲
蜚語交關上前公義不可留力請求去猶得乘傳歸
歸五年捐館舍計開 上震悼 詔宗伯與祭如例
謚曰莊簡詔太宰贈公官太子太保 詔司空遣官
治葬其於始終榮哀之際備矣公自少卽有大志嘗
書范文正做秀才以天下爲已任語於案頭以自勵

及年十五刑部公携之北上道遇故人馬光祿崇謙
時方議征安南馬遂以議征安南試公公援筆立就
分別處置曲中機宜其後安南事竟如公議平生推
進賢才培植善類出於天性爲儀制郎時當事者以
公資久將擢爲尚書少卿公聞而往謁徐文貞請得
讓同年友王僉事時槐以彰 國家崇獎恬退之意
文貞以語當事遽巡不能決久之公復力言於文貞
乃得請當孫太宰爲御史時論公專擅去 陛辭之
日邂逅孫公長安道中公前與孫揖曰某懇拙微君
言亦不能久於位特加以專擅意太甚耳詞氣和平

孫退而愧悔不已公亦知孫之無他及公佐銓至寧

銓所以推轂孫公者靡不至若御史蔡時鼎陳登雲

輩皆先後忤公者公知陳君才器不凡引爲知己公
尚書南刑部時蔡巡鹽兩淮淮商乘蔡以言事謫去
訴蔡於法司謂蔡納賄以私票與人壞鹽法公廉知
其誣力逐訴者以白蔡君且多方嗟薦之諸曹郎有
才力者及負氣而淹頓者皆爲薦引竟不令諸君知
也公晚秉銓尤汲汲以引用老成爲事或謂公曰公
何不登用後進爲將來地公曰後進行當有知而用
之者若老成人漸逼衆掄不及今柄用終老巖穴矣

吾何敢先身謀而後 國家也公自少留心典籍
得其精髓非世之借此以資譚柄者彌留之際醒然
不亂至於屬纊五日面目如生此其所得於攝持者
驗矣然公居常不數數以此語相知則崇正衛道之
心也公歷仕 三朝自爲郎至冢宰凡國有大政大
議衆皆需公一言以定及公去主持廟議者動稱乏
人至是卽向之齟齬公者皆追思公不置嗚呼此不
足以槩公之平生哉公自少沈酣六經尤好讀劉向
新序韓嬰詩傳故發而爲文簡古典則自名一家早
歲製作盡燬於災今惟奏議尺牘雜稿若干卷藏於

家

論曰 明興二百餘年太宰易名爲莊簡者晉陽喬公四明聞公至公而三耳喬公在嘉靖初時 肅皇帝赫然中興用意圖治登進才賢孜孜若不及而此時諸大臣若成都丹徒永嘉安仁南海遂寧皆能協力引用善類以佐熙明故喬公得因時以展其猷至嘉靖中事局易變動而多制聞公老成周慎熟於掌故藻鑑精明又與秉國大臣同籍猶得委曲以行其志及後則士習日漓機智百出邪正混淆甄別未易銓柄旁落多口亂正統均之地幾不可措手賴公負

人倫之鑒乘堅定之力乃能不爽於品題不搖於羣
議使正士吐氣宵人屏跡而銓柄之旁落者亦漸復
其舊天下翕然歸心為使得久在事其維持轉移當
有大愜羣望者顧不數月遽上印綬去可不謂天數
耶故予合三牋簡事並論之蓋觀於其所遭與其所
樹建之難易不獨可以知三君子而世道升降人才
盛衰之故亦因可攷焉

蘇太史編輯國朝獻徵錄卷之二十五

終